

目

440

867 6

印. = 4

史部載記類

政書類

地理類

目錄類

職官類

史評類

愛日精廬藏書志

卷十四至卷二十

愛日精廬藏書志卷十四

史部

載記類

吳越春秋十卷 影寫宋刊本

後漢趙晁撰

右吳越春秋十卷後漢趙晁所著予既刻越絕書遂併刻之蓋二書實相表裏而晁又為郡人其書固宜廣第訛舛特甚惜無從可以是正云嘉定甲申八月望日新安汪綱書

吳越春秋十卷 明初刊本

後漢趙晁撰 **元徐天祐音注**

前有天祐序題舊序蓋明

初重刊本也



吳越古稱東南僻遠之邦然當其盛彊往往抗衡上國黃池之會夫差欲尊天子自去其僭號稱子以告令諸侯及越既有吳句踐大盟四國以共輔王室要其志皆歸於尊周其知所天矣孔子作春秋雖小國猶錄而書之而况以世言則禹稷之裔以地言則會稽具區其川其浸周職方氏列爲九州之首皆足以望天下故記可闕而不傳乎吳越春秋趙曄所著隋唐經籍志皆云十二卷今存者十卷殆非全書二志又云楊方撰吳越春秋削繁五卷皇甫遵撰吳越春秋傳十卷此二書今人罕見獨曄書行於世曄傳在儒林中觀其所作乃不類漢文按邯鄲李氏圖書十志目亦謂楊方嘗刊削曄所爲書至皇甫遵遂合二家考正爲之傳注又按史記註有徐廣所引吳越春秋語而索

隱以爲今無此語者他如文選註引季子見遺金事吳地記載闔廬時夷亭事及水經註嘗載越事數條類皆援據吳越春秋今曄本咸無其文亦無所謂傳註豈楊方所已刊削而皇甫所未考正者耶曄書最先出東都時去古未甚遠曄又山陰人故綜述視他書所紀二國事爲詳取節焉可也其言上稽天時下測物變明微推遠僚若著蔡至於盛衰成敗之迹則彼已君臣反覆上下其論議種蠡諸大夫之謀迭用則霸王胥之諫一不聽則亡皆鑿鑿然可以勸戒萬世豈獨爲是邦二千年故實哉曄書越舊嘗浸粹歲久不復存汴梁劉侯來治越獎厲學校蒐遺文修墜典乃輟義田廩羨財重刻于學不鄙諛聞屬以考訂且命序其左端夫越人宜知越之故則是舉也於所闕不爲無

補遂不得辭厥既刊正疑訛過不自量復爲之音註併考其與傳記同異者附見于下而互存之惜其間文義猶有滯礙不可訓知不敢盡用臆見更定又無皇甫本可證姑從其舊以俟後之君子考焉侯名克昌世大其字云郡人前進士徐天祐受之序

大德十年歲在丙午三月音注越六月書成刊板十二月畢工

前文林郎國子監書庫官徐天祐音註

越絕書十五卷

明刊本

漢袁康撰

無名氏跋尾鈴虞山印記或牧翁故物歟

無名氏跋曰越絕復仇之書也子胥夫差以父之仇句踐以身之仇而皆非其道焉夫君天也君有臣而君殺之尚

可仇乎故子胥鞭平王之墓爲不義闔廬之死夫差使人謂已曰而忘越王之殺而父乎則對曰不敢忘三年乃報越故夫椒之敗釋越而不誅爲不孝會稽之樓苦身焦思嘗膽而食卒以滅吳不知越實得罪於吳而吳之赦已也故其郤公孫雄之請爲不仁春秋書子胥之事曰吳入郢狄吳而諱楚也於夫椒之戰則不書蓋不足乎書也於黃池之會書於越入吳狄越而咎吳也春秋之末復仇之事莫大於斯三者越絕實備之有國有家者可以鑒觀焉

華陽國志十二卷

舊抄本

錢磬室藏書

晉常璩撰

明何鏜吳瑄本俱闕卷十上中兩卷此則足

本也卷末有叔寶中吳錢氏所藏印兩印

李暨叔重刊序

嘉泰甲子

何氏手跋曰華陽國志十二卷初閱見其訛謬甚多疑非善本及以新刻對校乃知後來妄加竄定有使人笑來者此本尚存舊刻之真而出於錢叔寶家亦可信也康熙己丑焯記

黃氏手跋曰此書無宋刻則舊抄貴兼有郡先輩錢磬室圖記何義門跋并硃筆評閱語古色斑斕令人可愛紙本莓爛破損係義門返吳時覆舟黃流所厄恐不耐展讀命工重加裱托改裝倒摺向外庶免敝渝之患予友顧澗蒼藏空居閣抄本與此同出一源然楮墨之間古意稍遜當讓此本爲甲本因古書難得并著之以見罄室而外空居亦足競爽也黃丕烈

江南野史十卷

文瀾閣傳抄本

宋龍衮撰

原二十卷今闕十卷

錦里耆舊傳四卷

舊抄本

宋前榮州應靈縣令句延慶纂

原八卷今存五至八四

卷

南唐書三十卷

元刊本

宋馬令撰

序目卷一缺抄補

傳曰太熙之後述史者幾乎罵矣唐季五代大盜割據各亦有史而太熙之風往往有之南唐寢滅史官高遠慮貽後悔悉取史草焚之而死徐鉉湯悅奉太宗皇帝敕追錄所聞而忘遠取近率皆疎略先祖太傅元世家金陵多知南唐故事旁搜舊史遺文并集諸朝野之能道其事者未及撰次遽捐館舍今輒不自料纂先志而成之列爲三十

卷雖有愧於筆削而誅亂尊王亦庶幾焉崇宣乙酉春正月陽羨馬令

嗚呼五代之亂符璽竊於大盜中國變於夷狄先王之禮樂制度掃地盡矣李氏初據江淮建唐廟以隆親與夫祖契丹而絕其父者孰遑始郊祀於圓丘與夫尚野祭而焚紙緡者孰重五代之君若彼南唐之制若此則正統疑於不存而僭竊疑於無罪也予作此書尊天子於中原而僭偽之事則不爲南唐諱者豈無意哉蓋尊天子所以一天下之統書其僭所以著李氏之罪其統旣一其罪旣著則竊土賊民者無遁刑於天下後世矣昔孔子作春秋非徒載其陳言也竊取其義以爲人道之大法而已予之所論有合於此者弗可不察也王通之作元經第以進退南北

而亂其正統輒自比於孔子曰春秋元經於王道是輕重之權衡且孔子所書彼善於此則有之而正統常在於周通之所書者宋魏之間其統未嘗一也使後世擾擾而不知其正者必自通始嗚呼法春秋而不知春秋之法者豈特王通乎

南唐書三十卷

茶夢主人手抄本

采馬令

板心有茶夢齋鈔四字

目序

見上

姚氏手跋曰正德辛巳予聞江陰葉潛夫云靖江朱生藏有宋刻馬令南唐書許借未往迄二十餘年予恒往來于懷竟無所遇客歲館于宮保秦公偶鬻書者持元刻陸游南唐書來售殘編斷簡漫不可讀姑手錄之以備一家言

今年春得主洛川張君家塾暇日乃出馬令南唐書觀之
云是從先公官閩時所錄予曰此予二十年前求之未獲
者也遂抱疾錄一過藏諸篋笥庶爲陸游合璧若評騭異
同具馬端臨經籍考茲故略云嘉靖辛丑夏四月晦日勾
吳茶夢道人姚咨跋

安南志畧二十卷

文瀾閣傳抄本

元黎崩撰

高麗史一百三十九卷

抄本

明朝鮮正憲大夫工曹判書集賢殿大提學知經筵春秋
館事兼成均大司成臣鄭麟趾等奉教修 前有景泰二
年進書箋景泰二年朝鮮恭順王名珂之元年也凡世家四
十六卷志三十九卷表二卷傳五十卷目錄二卷合一百

三十九卷高麗王氏自梁末帝貞明四年代高氏有其國
建元天授稱後高麗傳三十二主歷年四百七十五爲其
臣李成桂所篡國亡此書紀王氏一朝之事治亂興廢制
度文物粲然可考亦可云高麗之良史矣 四庫全書存
目有高麗史二卷蓋偶存之殘帙此則足本也

鄭麟趾進高麗史箋

景泰二年

愛日精廬藏書志卷十五

史部

地理類

三輔黃圖六卷

明刊本 臨毛氏斧季校

不著撰人姓名

金吾

受業師黃琴六先生臨毛氏斧季

校宋本卷二建章宮條構字注御名蓋據南宋高宗時刊本也

序

黃琴六先生手跋曰此本據長洲千里顧君校本傳錄顧

君又從吾邑毛斧季校宋本錄出者也首尾通為一卷與

隋志合元本有鈎乙行欵係每半葉十行行每二十字至

二十二三字不等惜其中有缺而未鈎幾處顧云無從全

識其面目今亦不復備錄又中有宋本謬誤顯然者稍去之其兩通及存疑可備參攷者並著于篇云道光初元拙經居士廷鑑校訖識

三輔黃圖六卷 先君子手抄本

不著撰人名氏

歷代宮殿名一卷 抄本 從陳君子準藏舊抄本傳錄

宋翰林學士承旨太中大夫守工部尚書知制誥上柱國臣李昉等奉聖旨纂首周秦漢魏次西晉後魏周隋唐五代為正統又次三十六國六朝北齊為僭偽蓋宋承五代五代承唐唐承隋隋承周周承後魏後魏承西晉故序次如此

中興館閣書目曰開寶中翰林學士李昉承詔以前代宮

殿池苑臺觀門闕名號見於載籍者集為一篇上之 玉海一百五十八

直齋書錄解題曰歷代宮殿名一卷翰林承旨李昉等纂歷代及僭偽宮殿門闕樓觀園苑池館名無不畢錄

禁扁五卷 舊抄本

元東平王士點纂次

歐陽元序 至順元年

虞集序 至順癸酉

自序

右宮殿簿

元和郡縣志四十卷 舊抄本

唐金紫光祿大夫中書侍郎同中書門下平章事兼集賢

殿大學士監修國史上柱國趙國公臣李吉甫撰 闕卷
十九二十卷二十三二十四卷二十六卷三十六凡六卷
自序

太平寰宇記二百卷

舊抄本 季滄葦藏書

宋朝奉郎太常博士直史館賜緋魚袋樂史撰 闕卷四
卷一百十三至一百十九凡八卷每卷末有校勘未知撰
人卷首有季振宜藏書印記

自序

輿地紀勝二百卷

影寫宋刊本

從錢塘何氏藏宋刊本影寫

宋東陽王象之編 是書敘述詳核採摭繁富凡沿革風
俗形勝景物古迹官吏人物仙釋碑記詩文分門臚載上
可作考證地理之資下可爲登臨題詠之助其所引書如

國朝會要中興會要高宗聖政孝宗聖政中興遺史等書
皆傳本久絕藉此得考見崖略伏讀

欽定四庫全書總目云王象之有輿地紀勝二百卷今未見傳
本則其佚久矣此本從宋雕本影寫闕卷十三至十六卷
五十一至五十四卷一百三十五至一百四十四卷一百
六十八至一百七十三卷一百九十三至二百共闕三十
二卷

世之言地理者尚矣郡縣有志九域有志寰宇有記輿地
有記或圖兩界之山河或紀歷代之疆域其書不爲不多
然不過辨古今析同異攷山川之形勢稽南北之離合資
遊談而誇辯博則有之矣至若收拾山川之精華以借助
於筆端取之無禁用之不竭使騷人才士於一寓目之頃

而山川俱若効奇於左右則未見其書此紀勝之編所以
不得不作也余少侍先君宦遊四方江淮荆閩靡國不到
獨悵未能執簡操牘以紀其勝及仲兄行甫西至錦城而
叔兄中甫北趨武興南渡渝瀘歸來道梁益事皆袞袞可
聽然求西州圖記於篋中藏未能一二雖口以傳授而猶
恐異時無所據依也余因暇日搜括天下地理之書及諸
郡圖經參訂會粹每郡自爲一編以郡之因革見之編首
而諸邑次之郡之風俗又次之其他如山川之英華人物
之奇傑吏治之循良方言之異聞故老之傳記與夫詩章
文翰之關於風土者皆附見焉東南十六路則倣范蔚宗
郡國志條例以在所爲首而西北諸郡亦次第編集第書
品浩繁非一家所有隨假隨閱故編次之序未能盡歸律

度然而一郡名物亦庶幾開卷而盡得之則回視諸書似
未爲贅也或者又曰昔太史公方行天下上會稽探禹穴
歷覽山川奇傑之氣以爲著書立言之助先儒至欲効子
長之遊而後始學其爲文今子乃合天下之書不出戶牖
而欲名山大川若躬履焉於子長之遊未免有戾乎余因
自笑曰昔子長因遊而得作書之趣余乃因書而得山川
之趣其迹雖不同然亦未可盡以迹拘也當從識者而問
之嘉定辛巳孟夏東陽王象之謹序

東陽王象之儀父著輿地紀勝一書甚鉅書成句余爲序
且曰吾書收拾天下郡縣山川之精華使人於一寓目之
頃而山川俱若効奇於左右以助其筆端取之無禁用之
不竭余告之曰昔昌黎韓公南遷過韶州先從張使君借

圖經其詩曰曲江山水聞來久恐不知名訪倍難願借圖
經將入界亦逢佳處便開看然則天下郡縣山川之精華
是真名人志士汲汲所欲知也然所在圖經類多疎略舛
訛失之鄙野多矣必得學者參伍考正而勒爲成書然後
可據也本朝真宗時翰林學士李宗諤等承詔撰諸道圖
經凡一千五百六十六卷今其書存者止十之三四甚可
惜也然四方一郡一邑隨所至亦各有好學之士收攬記
識甚備其目一一見於冊府纂錄最可稱者如唐麗正殿
直學士韋述東西兩京新記及本朝龍圖閣直學士宋公
敏求長安河南二志尤爲該贍精密今儀父所著余雖未
睹其全第得首卷所紀行在所以下觀之則知其論次積
日而成致力非淺淺者蓋其書比李氏圖經則加詳比韋

宋所著記志庶幾班焉使人一讀便如身到其地其土俗
人才城郭民人與夫風景之美麗名物之繁縟歷代方言
之詭異故老傳記之放紛不出戶庭皆坐而得之嗚呼儀
父之用心可謂癡矣然余又嘗語儀父曰古人讀書往往
止用資以爲詩今儀父著書又祇資它人爲詩不亦如羅
隱所謂徒自苦而爲它人作甘乎儀父笑而不答余以是
知儀父前所與余言者特寓言耳其意豈止此哉夫昌黎
大儒也固嘗六土地之書未嘗一得其門戶且謂古之人
未有不通此而爲大賢君子方欲退而往學焉意其學也
必也窮探力究洞貫本剽非若近世膚末昧陋爲口耳之
習姑以眩人夸俗而已是則昌黎道術文章之盛所以名
當代而傳後世者非以此乎蓋聞之凡爲士者學必貴於

博非博則無以至於約然其大歸必貴於有用則始爲不
徒學也蕭何從沛公入關先收秦府圖書故因以知天下
阨塞戶口多少之處漢之得天下此亦其大助東方朔劉
向皆以多識博極獲備天子訪問爲國家辨疑祛惑豈曰
小補其事今見山海經首本朝劉侍讀原父奉使契丹能
知古北口松亭柳可道里之迂直以詰敵人敵相與驚顧
羞惡卒吐實以告士君子多識博極至此豈不足以外折
四夷之姦心表中國之有人哉是則地里之書至此始爲
有用之學至若許敬宗之對唐高宗第能明帝丘得名所
自遂過眩其長以矜怵於人此則爲士者之所笑而不道
者也然則余之所望於儀父者固以朔向及劉侍讀之事
豈但以資它人爲詩而已乎前言姑戲耳寶慶丁亥季秋

三日眉山李皇序

口鳳口口誨墨示所著紀勝之書口拜涵讀略窺一斑輿
地萬里如在目前備見學識之博收拾之富攷究之精會
粹之勤不勝嘆伏作邑而有餘力及此豈俗吏所能爲哉
久欲率諸公薦敷于朝以連日禱雨未暇及近方得與口
帥言之亦不過在口鳳未行之前具此稟復伏幸知悉凡
有手諭願承

下疑有關

右謹具呈

七月日朝請大夫直寶章閣口口制口口口口事同知
洪州口口口口曾口鳳劄子

直齋書錄解題曰輿地紀勝二百卷知江寧縣金華王象
之撰蓋以諸郡圖經節其要略而山川景物碑刻詩詠初

無所遺行在官闕觀寺寔冠其首關河版圖之未復者猶不與焉眉山李說齋季允爲之序

王氏輿地紀勝二百卷子求之四十年未得近始於錢唐

何夢華齋見影宋鈔本假歸讀兩月而終篇每府州軍監

分子目十二曰府州沿革

若有監司軍將駐節者別敘沿革於下

曰縣沿革

曰風俗形勝曰景物上曰景物下曰古迹曰官吏曰人物

曰仙釋曰碑記曰詩曰四六今世所傳輿地碑記目者蓋

其一門不知何人鈔出想是明時金石家爲之也此書所

載皆南宋疆域非汴京一統之舊然史志於南渡事多闕

略此所載寶慶以前沿革詳贍分明裨益於史事者不少

前有嘉定辛巳孟夏自序寶慶丁亥季秋李璽序及曾口

鳳劄子象之字儀父金華人嘗知江寧縣事不審終於何

官其自序云少侍先君宦游四方江淮荆閩靡國不到又

云仲兄行父西至錦城叔兄中父北趨武興南渡渝瀘而

陳直齋亦稱其兄觀之爲夔路漕則中父疑卽觀之字又

記一書稱王益之字行甫金華人蓋卽儀父仲兄而其父

之名則無從攷矣此書體裁勝于祝氏方輿勝覽而流傳

絕少雖闕三十二卷究爲人間希有之本予以垂老得寓

目豈非大快事耶嘉慶壬戌中冬竹汀居士錢大昕書

新編方輿勝覽七十卷

舊抄本

宋建安祝穆和父編

輿地有書尚矣自上世九丘旣逸而夏之禹貢周之職方

燦然明備至秦郡縣天下兩漢遂有地理郡國志歷代多

倣之唐圖十道皇朝志九域皆是物也然秉筆記載實難

文獻不足無以參稽而互考非足履目睹則真贋詳略何從信之司馬遷貫紬經傳旁採子史又聞長老之所稱而必觀九江望五湖闕四海行淮泗而後成河渠之書東方朔誦詩書二十二萬言三冬文史足用又隨師踐赤縣遨五嶽行澤陂息名山猶以所見參酌山海經而後神異經十洲記始作學問不博聞見不廣涉歷不親而欲會集四海九州山川風俗土產景物人材文章名數沿革之詳特誣而已建陽祝穆和父本新安人朱文公先生之母黨也幼從文公諸大賢游性溫行淳學富文贍雅有意於是書嘗往來閩浙江淮湖廣閒所至必窮登臨與予有連每相見必孜孜訪風土事經史子集稗官野史金石刻列郡志有可採摭必晝夜抄錄無倦色蓋爲紀載張本也且許異

日成編當以相示如是者累年近訪予錢塘馬城之竹坡曰編成矣敢名以方輿勝覽而鉅梓以廣其傳庶人人得勝覽也君幸爲序以冠其首予丕視所載辭簡而暢事備而核各州風物見於古今詩歌記序之佳者率全篇登入其事實有可拈出者則纂緝爲儷語附於各州之末較之錄此而闕彼舉略而遺全循訛而失實泛濫於著述而不能含咀其英華者萬萬不侔也信乎其爲勝覽矣學士大夫端坐牕几而欲周知天下操弄翰墨而欲得助江山當覽此書毋庸他及所謂執璿璣以觀大運據要會以觀方來不勞餘力盡在目中信乎其爲勝覽矣雖然我瞻四方禹迹茫茫思日闕於先王慨未歸於故疆必也志存乎修攘步極乎亥章使吾和父涉歷彌長聞見彌詳紀載益鋪

張而勝覽益輝煌是乃爲邦家之光予尚得以攫攘其旁
嘉熙己亥良月望日新安呂午序

始予遊諸公間強予以四六之作不過依陶公樣初不能
工也其後稍識戶牖則酷好編輯郡志如耆昌歎予亦自
莫曉其癖所至輒借圖經積十餘年方輿風物收拾略盡
出以諗予友乃見譏曰還如食小魚所得不償勞予恍然
自失益蒐獵古今記序詩文與夫稗官小說之類摘其要
語以附入之予友又喟曰天吳與彩鳳顛倒在短褐予復
愧其破碎斷續而首末之不貫也又益取夫鉅篇短章所
不可闕者悉載今文大書以提其綱附註以詳其目至三
易藁而體統粗備予友亦印可焉予猶未欲以爲然也既
又攜以謁今御史呂公竹坡先生幸不斥以狂僭辱爲之
序走不足以當也嗟夫昔者孔子嘗曰爲命禪謹草創之
世叔討論之行人子羽修飾之東里子產潤色之夫以一
命令之出猶更四賢之手矧予陋聞謏見徒以兩耳目之
所及而欲該天下之事物物坎蛙窺天其不量甚矣雖
然世有揚子雲必知是編之不苟豈直爲四六設哉若夫
網羅遺逸啟發愚蒙予方有望於博雅君子嘉熙己亥仲
冬旣望建安祝穆和父書

寰宇通志一百十九卷 明景泰刊本

明文淵閣大學士陳循等奉敕撰

成祖時採錄天下郡

縣圖經編纂方始成祖上賓更歷三朝未克竣事景帝卽
位紹述先志續命纂輯勒爲成書爲卷凡一百一十有九
名曰寰宇通志英宗復辟以其書汎濫命儒臣約爲一統

志自一統志行而是書遂晦三百年來流傳絕少故著于

錄云

景帝御製序 景泰七年

陳循等進書表 同上

右總志

愛日精廬藏書志卷十五終

愛日精廬藏書志卷十六

史部

地理類

吳郡圖經續記三卷 舊抄本

宋 朱長文撰

自序 元豐七年

常安民書後 元祐元年

林處後序 元祐七年

祝安上鏤板序 元符庚辰

孫佑跋 紹興四年

乾道臨安志殘本三卷 抄本

宋 吳興周宗彥廣撰

原十五卷今存首三卷

鷹鶚跋

杭世駿跋

三山志四十二卷 抄本

宋梁克家撰

予領郡暇日訪無諸以來遺蹟故俗聞晉太康既置郡之一百一十三年太守陶夔始有撰記又四百五十六年至唐郡人林諤復增為之皆散逸無存者獨最後一百九十二年本朝慶歷三年郡人林世程所作傳於世自言視前志頗究悉然不過地里口口口土物產之大槩裒次亦復缺略迄今又一百三十九年興廢增改率非口口口闕不書者十九矣追惟往昔之事不可復記口常以為恨至耳目所接謂未遽泯沒則又不急於紀錄歲月因循忽莫省

憶使來者復恨之斯古今口口口為甚惜也乃約諸里居與仕於此者相與纂集討尋斷簡接據公牘採諸長老所傳得諸閭里所記上窮千載建創之始中閱累朝因革之由而益之以今日之所聞見厥類惟九靡不論載豈惟使四方知是邦於是為盛抑鄉古者有考焉書成為四十卷名曰三山志淳熙九年五月八日丁丑清源梁克家序

吳郡志五十卷 宋刊配舊抄本

宋吳郡范成大撰 闕序目卷八卷九卷十一卷十四十

五十八卷二十三至二十五卷二十九至三十一卷四十

一四十二四十六四十七凡十六卷以舊抄本補

趙汝談序 紹定二年

吳郡志五十卷 毛板校宋本

宋吳郡范成大撰 卷十一牧守題名吳淵下毛本闕鄭
霖等六人此本從影寫宋本校補

趙汝談序

新安志十卷 抄本

宋羅願撰

趙不悔序

自序 淳熙二年

雲間志三卷 抄本

宋楊潛撰

上中兩卷自封域至進士題名凡二十七門

下卷則詩賦墓誌記序說箴銘祭文是也敘述簡核不漏
不支蓋與志中之有古法者

自序 紹熙癸丑

會稽志二十卷會稽續志八卷 明正德川本

宋張湜撰

陸游序 嘉泰元年

張湜續志自序 寶慶元年

嘉定鎮江志二十二卷 抄本 從陳君子準藏本傳錄

宋盧憲撰

原書不著撰人名氏案直齋書錄解題載盧

憲鎮江志三十卷是書卷五寬賦有憲謹釋曰云云卷二
十一雜錄有憲竊謂云云卷二十二人物雜記有盧憲論
曰云云則是書為憲所撰無疑卷十學校載嘉定癸酉敎
官盧憲謁廟事則志當成于此時若卷五常賦載及嘉熙
寶祐景定德祐時事蓋後人所增入者首敘郡終拾遺凡
七十三門而以郡縣表冠首體例謹嚴採摭繁富所附案

語鈎稽考核亦極精密兩宋遺文所載尤夥考京口文獻者要必以是書稱首焉

直齋書錄解題曰鎮江志三十卷教授天台盧憲子章撰

剡錄十卷

文瀾閣傳抄本

宋高似孫撰

山陰蘭亭襍剡雪舟一時清風萬古冰雪王謝抱經濟具二戴深經學奈何純曰高逸也嗚呼山川顯晦人也人顯晦天也天下多奇山川而一襍一雪致有爽氣可謂人矣江左人物如此然二戴剡王謝亦剡孫阮輩又剡非天平漢迨晉永和六百餘年右軍諸人乃識剡永和至皇宋嘉定幾千年史君尹剡訪似孫錄剡事剡始有史桑欽水經鄴道元註道元魏人先儒辨其北事詳南事略似孫剡人

也如其精覈俟剡人宋嘉定甲戌高似孫序

剡在漢爲縣在唐爲崧州未幾復爲縣本朝宣和間以剡爲兩火一刀不利於邑故更今名邑舊有鄉四十後分十有三別爲新昌縣今所存纔二十七鄉耳夫州縣之名雖數變更然山川之靈蓋自若也使剡古而有志則歷代因革廢興之典百世可知也子懼夫後之視今亦猶今之視昔故爲剡錄十卷錄皆高氏所作凡山川城池版圖官治人傑地靈佛廬仙館詩經畫史草木禽魚無所不載度此板可支百年後之人毋以印剡而輒廢斯書也宋嘉定八年歲次乙亥縣令鄞人史安之序

赤城志四十卷

明宏治刊本

宋陳耆卿撰

圖牒之傳尚矣今地踰萬里縣不登萬戶亦必有成書焉矧以台爲名邦且稱輔郡綿涉千歲迭更數百守而闕亡以詔難之歟抑因陋襲簡不暇問歟蓋昔有守四人嘗厯其力於斯矣如尤公袤唐公仲友李公兼類鞅掌不克就最後黃公滄辱以命余偕陳維等纂輯焉會黃去匆匆僅就未備也束其藁十年矣更久則非惟不備而併與僅就者失之今青社齊公碩始至欲迄就未暇踰年報政遂復以命余於是郡博士姜君容總權之邑大夫蔡君範以下分訂之又再囑陳維及林表民等採益之旣具余爲諗沿革詰異同剴鉅纖權雅俗凡意所未解者恃故老故老所不能言者恃碑刻碑刻所不能判者恃載籍載籍之內有漫漶不白者則斷之以理而折之於人情事立之凡卷授

之引微以存教化識典章非直爲紀事設也如是者半載而書成嗟夫同是州也非可成於今不可成於昔也或曰有時爾昔歐陽公論學慨述吏道以爲有司簿書之所不責者謂之不急夫豈惟學哉語以圖謀非不急之尤者邪然而莫與於圖謀莫潔於簿書有司之所不急固君子所急也今公之爲政也剖叢滌煩燭幽洞隱於有司所急者誠井井矣而於君子所急者尤卷卷焉用能以半載之間紉千歲之闕增十年之未備洗數百守之因襲成四人之厯嗟夫此豈以其時哉書成者時也所以成者公之志也其志立則時赴之矣無其志而曰需其時者吾未之聞也豈惟一圖謀爲然天下事皆然嘉定癸未十一月旣望郡人陳耆卿序

謝鐸重刊序

宏治丁巳

寶慶四明志二十一卷開慶四明續志十二卷

文瀾閣傳抄

本

宋羅濬撰續志宋梅應發等撰

四明志作於乾道述於寶慶詳矣然則何續乎所以志大使丞相履齋先生吳公三年治鄞民政兵防士習軍食興革補廢大綱小紀也其已作而述者不復志昔人謂舊相作鎮者多不以民事爲意惟向文簡大耐官職勤於政事所至著稱公不均其逸而先其難過於文簡數等矣又謂寇萊公所至多游晏張文定尚蕩任情獲盜縱遣公慨念海道東達青齊禦侮弭盜之方周防曲至世人未必盡知也若夫切切畎畝盼盼雨晴一游一詠可以觀焉故併載

之于後以詔來者蓋公之學達於體用自身而家家而國而天下有本者固如是也豈規規然求度越於寇張二公哉雖然鄞猶故鄞也昔何爲而匱今何爲而豐者昔何爲而蕩無綱紀今何爲麤知理法覽者必有得於是編之外開慶元年中秋日門生迪功郎慶元府府學教授梅應發奉議郎添差沿海制置大使司主管幾宜文字新添差通判鎮江府劉錫百拜謹書

海鹽澉水志八卷

文瀾閣傳抄本

宋常棠撰

嘗謂六典不作無以考周家風土之厚薄民物之耗豐圖籍不收無以知秦人山川之扼塞戶口之強弱此澉水之志不可無也澉水斗大一隅厥土斥鹵凡邱源之流時稅

賦之重輕道途之遠近聚廬之衆寡與夫選舉名數先賢遺跡素乏圖經茫無可考叔韶效官于茲甫及半禩正欲搜訪輿理爲紀載史事鞅掌未暇也竹窗常棠字召仲寓居是鎮一日告余曰郡有嘉禾志邑有武原志其載澈水之事則甚略焉使不討論聞見綴緝成編則何以示一鎮之指掌於是正訂稽考集作一經名曰澈水志澈水者蓋水經所載谷水流出爲澈浦者是也召仲其容辭紹定三年重陽前一日修職郎監嘉興府海鹽縣澈浦鎮稅兼煙火公事羅叔韶序

紹定三年鎮尹羅儀甫屬余撰澈水志雖一時編集大略而儀甫滿去竟弗暇聞逾七八政粵歲旣久訂正尤詳因見邊孫君來此聽訟優長遇事練熟雖鎮場廢壞非疇曩比然能公謹廉敏明燭隱幽才幹有餘趁辦自足爰割已俸售募鐫行水軍袁統制聞而喟然曰是書不刊于鎮稅全盛之前乃刊于鎮稅凋弊之後甚可嘉已銳捐梓料肅贊其成噫元和郡縣志丞相李吉甫所制也後三百餘年待制張公始刻于襄陽今余所編澈水志後二十七禩權鎮孫君卽鏤于時阜則是書之遇知音不又大可慶耶竹窗常棠

淳祐臨安志六卷

抄本

宋施鏐撰

原書卷數無考今存城府山川兩門自卷五

至卷十凡六卷題稱臨安志無淳祐字亦無撰人名氏伏讀

欽定四庫全書總目云周淙創爲臨安志其後淳祐間施鏐成

淳間潛說友歷事編纂皆有成書今惟潛志尚存鈔帙周
施二志世已無傳云云是書所載事迹至淳祐止稱理宗
爲皇上其爲施志無疑敘述簡雅徵引該洽所引祥符圖
經宋代已佚藉此得稍存崖略遺文逸詩多有咸淳志所
未載者書雖殘闕亦足爲考證之資也

城府小序曰自古圖謀所載郡國必繫之於山蓋陵谷之
遷變不常而城邑之更易亦異山則終古表立而考論輿
地者恃以爲識焉錢塘舊治武林山猶云逼江則今之湖
固與江通也華信作塘乃徙平地則已漸爲陸矣若沙河
漾沙坑與所謂灞頭之類皆古水所及也隋代始州於柳
浦西依山築城嘗慨然求所謂柳浦者已不可考而依山
所築則今之鳳凰山也前治武林山治後鳳凰山兩山之

間昔水今陸豈非天所以啟神明之奧乎厥今商邑翼翼
四方之極巍巍煌煌不可尚已抑嘗聞長安之都八街九
陌相爲經緯中爲馳道無得輒行而左右升降有上下之
別是知壯麗以重威矣亦知京兆爲郡國首矣然馬廩歷
舉高結大袖之謠以爲雖或吏不奉法良由慢起京師周
良有言尙方今造一物小民明已瞬睨宮中朝製一衣庶
家晚已裁學然則所謂爲四方極爲郡國首者要必有在
而天造地設以成神臯盛大之勢已非一時一世所積又
如是其不易然也故具論之敘城府第三

山川小序曰蓋嘗登天目山憑仙壇石屋見山皆西南馳
雙溪並趨而合于於潛縣峯巒似少駐回望天目會雲中
如沉雄古大將按轡其後山大勢不可遏少決驟已抵臨

安縣大官山者直培塿耳循而至九鑠山蓋略爲盤礴環以天柱諸峯若躄止息者已而轟轟赴餘杭下武林靈隱山始韶秀而山於是左右分北高峯左轉抵葛嶺下標以保叔塔右轉一支挾南山標以雷峯塔二塔爲西湖門戶而山特派起爲南高峯捷以八蟠慈雲諸嶺翼爲七寶鳳凰山昂頭布尾若翔而集前界大江乃止吁亦誠異矣猶未爲異也又嘗自黟歙諸山循行括蒼天台皆魁岸嶄特至沃州下嵎岷山漸平行薄雲門會稽浸以鏡湖纔少舒暢文巒細巘靡靡至西陵所謂越王山者旁率諸山咸聳亦界江而止吳越兩山於是相主賓而淞河衡貫焉然後瞿然嘆曰山川無情也而天以是爲巧天非能巧也而氣以是爲會然則氣之所會天不知其爲巧山川不知其爲

情彼大行黃河嵩洛雍渭之勢可坐想也夫杭之山川其美衆矣大較當以是觀之叙山川第四

淳祐玉峯志三卷續志一卷

抄本

宋陽羨凌萬頃陳留邊實撰續志**宋**陳留邊實撰理該

文核綱舉曰張考崑山文獻者以是二書爲最古原書闕文頗多庚辰仲夏從陳君子準藏舊抄本校勘一過訂誤補缺始稱完善云

崑山爲吳壯邑地險而俗勁田多而賦重凋弊積有年矣故於稽古載籍之事多缺焉考之吳郡志雖附書一二其詳不可得而聞公澤承乏學製每與鄉校諸友議斯缺典欲網羅補苴然方有公事未皇也直學凌君掌儀邊君俱有俊譽慨爲已任搜訪掇拾斯已勤矣地理標名財賦之

件曰嘗與參訂至若廢置因革人物異聞視昔爲詳將求
印證於多識前言往行者俄及瓜懼失其傳而二君之勞
孤矣姑錄諸梓以俟方來庶知今者果不謬古者猶可質
云淳祐壬子中和節東嘉項公澤謹跋

郡縣必有志獨崑山無之豈前人之長不及此哉期會之
事有急於此則謂之不急也亦宜然往無所稽來無所據
識者每以爲歎永嘉項公出宰茲邑百廢具興一日下叩
圖經事以萬頃嘗輯敘一二蓋略焉而未備也掌儀邊君
尤勤於搜訪遂相與編次期年乃成本古今郡志所附而
益以耳聞目見之可攷者大槩公之修創增益爲多昔人
以笏比甘棠後之覽者猶笏然則是志爲不徒作矣博雅
之士尙訂正之松臞凌萬頃叔度書

玉峯有志尙矣淳祐壬子編類於邊君直學之筆刊鏤傳
信距今逾二十稔咸淳壬申余捧檄代庖斯邑繙閱是書
頗有遺佚若派買之公田撥隸若學校之創主學建直舍
或述前輩之詩而曰載諸雜詠者爲不見全璧之歎或題
掄魁之名而不編入人物者有幹乘周鼎之疑是皆累於
時之所不及失於見聞之所不逮耳余因以續志屬之邊
君邊君曰某有志於此久矣敢不自力迺會粹古書搜覽
今籍三閱月而書成增入者三十餘條改定者二十餘條
混混乎風土之攸宜總總乎事物之備舉理該文核綱舉
目張其長公訓導銓釋雜詠亦一新之余重鄉拜觀不忍
釋手謹命工繡梓以壽其傳後之覽者與吾同志嗣而續
之庶斯文之不泯也是歲中秋日合沙玉淵謝公應謹書

石湖先生志吳郡嘗與龔勝周三君子相詮次有某人持某事求入志不得遂譁曰志非石湖筆也石湖嘆不辨崑志之作向出於二人之手事詞或未一今夏不揆續修將以釐前誤而紀新聞或有議其擅者其與議吳志者若相反焉於此可以知後進之視先達天地之相遠絕也於其鉅梓之畢書以自訟此意邊實謹書

余先世自常熟雙鳳里徙家嘉定西鄉逮余八傳矣嘉定本崑山地宋南渡始析爲縣徵吾鄉掌故者沂而上之當求諸崑山而宋元志乘訪尋終不可得意常恨之今春聞袁又愷購得凌萬頃邊實王峯志及實續志亟假歸讀之志成於淳祐壬子續志成於咸淳壬申皆在析縣以後不敘嘉定事然遍覽近代藏書家目錄均未之及乃知天壤

間竒祕之物固自不乏特未遇波斯不免埋沒於瓦礫耳宋世士大夫宦成之後往往不歸故鄉而舉子亦多就寄居求解此志所載人物如王絢劉過吳仁傑陳宗召敖陶孫張匯趙監樂備輩皆寓公也王葆傳稱崑山自孫載登第甲子一周而葆繼登第邑人美之今檢進士題名則孫後王前尚有龔程龔况唐輝黃偉衛闔張德本六人殆皆由寄居登第而不由本縣申送者乎凌萬頃字叔度景定三年進士本陽羨人其父爲顏氏壻因家焉邊實本開封人樞密直學士肅七世孫自高祖以下始居於此志旣爲其曾祖惇德立傳而續志復爲自序一篇追本得姓之始遙遙華胄敷衍千言難免汰哉叔氏之譏矣嘉慶丁巳秋八月嘉定錢大昕跋於紫陽書院

景定建康志五十卷 舊抄本

宋承直郎宜差充江南東路安撫使司幹辦公事周應合

修纂 闕卷六至十卷二十九至三十三卷四十三四十

四凡十二卷抄補

馬光祖序 景定辛酉

馬光祖進表

馬光祖獻太子牋

周應合修志本末

顧氏手跋曰此讀未見書齋所藏景定建康志依宋本舊

抄也失去者十二卷

六至十二二十九至三十三四十三四十四

蕘圃既從家抱

冲本抄完復以卷中闕頁屬予補寫意謂當是所據宋本

模糊抱冲本雖有或係出于補板故不屏入而附于後蓋

慎之至也抱冲本有錢竹汀先生校語十餘條別為一紙

錄之嘉慶丁巳澗蕢記

黃氏手跋曰嘉慶丙辰從書肆得影宋抄景定建康志殘

本九冊有半問其由來蓋浙省書攤以此為糝補書籍之

廢紙已去其二冊有半彼以素紙易之故奇零如是予因

假抱冲本抄補至丁巳冬竣事抱冲本為鎮洋聞公名璣

字書臺之所藏與嘉定錢少詹相友善少詹曾從借觀故

附校語于其中黃丕烈識

又曰嘉慶庚申陽湖孫觀察借予是本寫樣付梓孫僑寓

金陵從節署獲覩康熙間

敕賜宋本間有闕失故假影鈔本相勘辛酉冬以原書歸予并

惠新刻本子逐一繙閱其間實有誤處宜增補更改者如

卷一第六葉留都圖原本闕宜存空白卷十三第三十二
葉原本有宜補卷二十二古南苑以下行欵改宜更正卷
二十九第一葉卷四十五第一葉文異俱宜更正未知按
勘時何所據而不遵影宋本也壬戌小春丕烈識

景定嚴州新定續志十卷

文瀾閣傳抄本

宋鄭瑤方仁榮撰

方逢辰序曰郡之有誌所以記山川人物戶口田賦凡土
地之所宜也嚴於浙右為望郡而界於萬山之窟厥土堅
而隔上不受潤下不升鹵雨則潦霽則槁厥田則土淺而
源枯介乎兩節節級級如橫梯狀其民苦而耐其俗嗇
而野其戶富者畝不滿百其賦則土不產米民僅以山
而入帛官兵廩率取米於隣郡以給而百姓日糴則取

給於衢婺蘇又之客舟較之澗右諸郡其等為最下下而
嚴之所以為望郡而得名者不以田不以賦不以戶口而
獨以雲山蒼蒼江水泱泱有子陵之風在也郡誌自淳熙
後缺而不修者距今七十餘年矣吳越錢君可則以太府
丞來守嚴政事之暇為之訪蒐以補其缺編削訖事走書
屬予為序予謂嚴為我太宗皇帝高宗皇帝建旌之地今
皇儲賜履之封則一郡之山川人物風俗戶口田賦職方
氏皆欲究知之矧惟天子聖明勤恤民隱凡州牧之出辭
入覲必詳訪焉是編之作非惟可以備顧問亦可以少助
宵旰民瘼之萬一也

蛟峯集

咸淳臨安志一百卷

舊抄本

宋潛說友撰

闕卷六十四卷九十卷九十八至一百凡

五卷

恭維聖宋受命奄旬萬方大明中天燭燐自息迺太平興
國三年吳越以其地歸我職方氏是歲杭始置守丞建炎
陞府遂爲行在所按古志杭舊屬會稽禹於此舍航而陸
故名恭聞光堯大駕初臨登郡治中和嘗作爲歌詩慨懷
夏后氏之烈聖心曠數千百載而神交固有幾乎禹蹟之
外其亦見夫流風躋俗得過化之所存而有感焉耳嘗試
觀之有車船穉樁之蹟故其人至於今忠以勤有苗山封
爵功德之會故其人至於今勸於爲善有織貝橘柚之貢
故其人至於今知尊君而愛親錢氏生長其間性習自然
國三世四王而終不失其臣節迨宋之興也深察夫人心
歸德之天如川斯赴莫之能止則一旦決然舍去其固有

之業以委命于朝忠懿誠忠矣抑杭之人何莫非忠懿天

地之間燥溼風雲萬物一氣杭獨

空十

之所漸者遠知帝

王正統所在焉故也自國家眎之如在甸服率

空十地

大故要必有所甚重者湛恩釀化涵浸滋久益固結而不
可解南渡艱難之際旄倪提攜左簞右壺牛酒相屬于道
頓首六蚪之下如見父母誓有殞無貳雖屢更大震撼而
莫之變迄用永我命於茲新邑迹是三百年間杭之有功
於國家也甚大而祖宗之有德于杭亦深矣開慶羣小誤
國召戎一時謀臣或倡異議幾搖根本賴先皇帝蔽自上
志獨倚今太傅辯章國公外頓八紘內維九鼎宗廟社稷
之靈恃以妥寧率之披攘蒙霧再奠宇宙至今八街九陌
歌鼓四時往往相與咨歎不圖復見今日烏乎我理宗有

德於杭也不又大歟杭之福諸夏之福也肆皇上克篤前
烈宅中圖大不以愚臣爲不肖命殿是邦幸遇朝廷治平
年穀屢登浩穰之府化爲簡淨因得以蓋其疵糝暇日視
故府闕郡乘或病其漏且舛乃嘗而正之增而益之凡爲
圖爲表爲志總百卷而冠以行在所錄尊王室也旣成上
之天府以備政教之萬一焉禹貢稱冀州旣載釋者謂以
貢賦役事載之書其于天子所自治之國謹重固如此九
州攸同言歸舊京聖子神孫尚克念我光堯懷禹之遺志
云中奉大夫權戶部尙書兼詳定敕令官兼知臨安軍府
事兼管內勸農使兩浙西路安撫使馬步軍都總管兼點
檢行在贍軍激賞酒庫所繕雲縣開國男食邑三百戶臣
潛說友謹序

嘉禾志三十一卷舊抄本

元徐碩撰

圖志之書古史筆也成周職方掌天下之圖外史掌四方
之志事亦重矣嘉禾爲志何昉乎猶記袁似衢爲郡治中
其家富有古書江浙圖志無不備獨禾興闕然非闕也禾
興經邑爲州才三百載五代至宋初皆倥偬不暇真宗景
德四年嘗詔諸道脩圖經僅得海鹽一志而已淳熙甲午
郡守張元成始延聞人伯紀爲郡志此作古也前乎伯紀
所謂舊經雖博覽之士無所見其簡略可知後乎伯紀郡
守岳珂嘗命鄉先輩關表卿重修且徧檄諸邑搜訪古跡
可謂勞于用力書未成而勸翁改調上而無紀錄之冊可
參次而無老成之士可質又次而無賢子弟可詢其家世

其欲正譌補闕豈不難哉仰惟皇帝考圖數貢自北而南此不容于浸廢往者郡經歷單君慶因請重修郡博士徐君碩承命屬筆搜獵散亡其綱正其篇目加多旣完矣而母丘之板則未也萊山劉公傑來殿是邦路推翟公汝弼啟其議諸路官又相其成可謂是書之幸夫圖志重事也其存亡夫豈偶然雷次宗非無豫章紀洪駒父求之不得見范石湖非不藁吳郡志以妄議而不得刊今嘉禾志闕而全絕而續郡侯其有功矣哉昔竇德元不能對帝丘之問人到於今陋之今郡人得是書可以不爲德元矣余故喜爲之辭至元戊子孟夏里人郭晦序

郡有志倣九丘遺意也書以志名凡一郡之事皆在所當錄豈特土地所生風氣所宜而已哉嘉禾在春秋爲檇李至吳黃龍三禩以禾生由拳野故名自春秋距今千七百餘年其間有沿有革有廢有置世道污隆之故人物盛衰之由與夫山川風景之所以殊郡邑事蹟之所以異其可紀者何可勝數而舊志多簡略弗載宋嘉定甲戌郡守岳侯珂悼前聞之遺闕嘗命鄉先輩關表卿棊任行人子羽之事編藁將上而岳侯去鄉論惜之越六十三載皇帝撫有江南寸天尺地無一不入版圖內迺至元甲申克齋單公慶來佐郡幕公餘過從輒清談竟日每喟然嘆曰圖志三歲一上法也此邦自總府開藩亦旣數年而郡志未備非闕典歟遂創議檄委郡博士徐君碩重加修纂君承命惟謹網羅散失抉剔幽眇攷古訂今哀集會粹曩之爲卷者五今之爲卷者三十有二曩之爲門者二十有五今之

爲門者四十有三彪分臚列此志得爲全書徐君之用功亦勞矣編成而萊山劉侯傑實來一日噦鸞戾泮路推良佐翟公汝弼以是白侯侯喜退而諗於同列同列亦喜亟命工刻諸梓時與人會事與機投莫不慶是書之遭昔張茂先志博物士歆其才蕭相國收圖籍史牘其識向非侯有相國之識思以其知戶口爲急務則此志編而不刊與不編等徐君雖有茂先之才其何以自見是舉也侯旣能俾創議者不至爲岳之中沮又能俾修纂者不至爲關之徒勞侯亦賢矣哉侯不鄙屬余序奚敢以老鈍辭雖然此一郡事也侯賦政于外屢殿名邦入坐廟堂將以均四海爲已任他日志輿地志九域必有能紀侯之勲業者侯其勉之至元著雍困敦孟夏朔日里人前進士納軒叟唐天

麟書

類編長安志十卷

舊抄本

萊竹堂藏書

京兆路儒學教授駱天驥纂編開成路儒學教授薛延年校正 是書取宋敏求志刪去繁蕪撮其樞要增入金元沿革分門類聚故曰類編宋元地志大江以北自齊乘外無一存者是書雖以古蹟爲主凡州郡之變更城郭之遷移以及山川名勝宮室第宅邱陵冢墓與夫古今興廢之殊名賢游覽之作無不備錄又附之以紀異辨惑而以石刻終焉則列之郡縣志中當無不可所採如地理叢編三輔會要今且無有知其名者金元詩文所載尤夥俱足以資參考是書也非所謂絕無僅有者歟卷首題薛延年校正延年當卽注人倫大統賦者文淵閣書目萊竹堂書

目俱著錄此本有葉伯寅圖記及葉氏藏書印記知卽紫竹堂舊藏本也

雍之長安其來久矣乃古之鄉聚名在豐鎬間周秦時已有之李善西都賦注漢高帝都關中築宮城擇嘉名可長安於子孫故曰長安城可長樂於宮室曰長樂宮長安之名自此始著宮室記曰秦之咸陽北至九嶷南至南山東至河西至汧離宮別館相望聯屬木衣綿繡土被朱紫宮人犬馬不移樂不改懸窮年忘歸猶不能遍至漢武廣開上林苑中有三十六宮二十二觀秦之故宮莫不增葺秦迄今寥寥千五百載兵火相焚蕩宮闕古蹟十亡其九僅有存者荒臺廢苑壞址頽垣禾黍離離難以詰問故老相傳名皆訛舛如秦莊襄王陵爲韓信冢漢長安城爲陽甲

城隋太極殿基爲走馬樓董仲舒墓爲蝦蟇陵漢武太一谷爲炭谷唐興慶宮爲九龍池雖有舊記各紀一時之事其沿革互換之名各不同宋敏求編長安志自周秦至唐宋唐京兆府管二十三縣宋永興軍領十三縣華耀乾三州鳳翔一府關商同二州華止有渭南蒲城兩縣殿祠一名今爲三縣漆沮二水同爲一河漆出耀州俗號石州河至櫟陽南交口合渭沮出同州號洛河三合口合渭相去百餘里爲漆沮一河其故事散布州縣難以檢閱僕家本長安幼從鄉先生游兵後關中前進士碩儒故老猶存百人爲士林義契耆年文會講道之暇遠游樊川韋杜近則鴈塔龍池其周秦漢唐遺址無不登覽或談故事或誦詩文僕每從行故得耳聞目覩每有闕疑再三請問聖元皇

子安西王胙土關中至元癸酉創建王府選長安之勝地
王相兼營司大使趙以僕長安舊人相從遍訪周秦漢唐
故宮廢苑遺蹤故蹟自豐鎬阿房未央長樂太極含元興
慶魚藻靡不登歷是以長安事跡足履目見之熟從心之
際每患舊志散漫乃剪去繁蕪撮其樞要自漢晉隋唐宋
金迄皇元更改府郡州縣引用諸書檢討百家傳記門分
類聚并秦中古今碑刻名賢詩文長安景題及鴻儒故老
傳授增添數百餘事裒爲一集析爲十卷目之曰類編長
安志覽之者不勞登涉長安事迹如在目前豈不快歟老
眼昏花中間多所脫略訛錯更埃好古博雅君子改而正
之元貞丙申中元日藏齋遺老駱天驥引

長安古都會也自周秦漢魏已降有國者多建邦於此所
以山川之形勝宮室之佳勝第宅之清勝丘陵之名勝爲
天下最以其歷代沿革之不同互換之或異有好事者爲
書以志之如三輔黃圖三輔決錄西京雜記關中記景龍
文館記等書或失之於繁或失之於簡莫如長安志之詳
且盡也然或問一山一水一臺一榭茫然莫之能對良由
卷軸之多分布散亂未能詳涉而遍窺也學者病之藏齋
先生駱公飛卿辭聲利而遠市朝老於翰墨者也讀書樂
道之餘取長安舊志前後二十卷十餘萬言門分而類別
之使水能會涇渭灞滻之名山能萃太華終南之秀凡都
邑宮觀丘陵墳衍沿革興廢之名賢豪居處之迹士夫經
行之地儁人題品之文又注於下綦布星羅若網在綱有
條而不紊書成或病其碎愚曰世之類書多矣如儀禮則

指某事而必窮其源通典指某事必盡其要通鑑事總韓柳文類皆此意也儻人物混則孰能辨夷夏之殊五穀雜則孰能辨菽麥之異且志曰方以類聚物以羣分不如是則不能成治道而贊化育也物且如是書何不然若鉅木以行使游秦者不勞登涉而知地理之詳未至秦者得觀此書日下長安宛在目前矣又不可謂秦無人焉大德戊戌清明后二日安西路儒學教授鹿溪賈馘文裕序

九丘有書九州有貢地理有志寰宇有記皆四海之學也或有山崩川移陵遷谷變歷代沿革隨時廢興所以不能必其主名儻非識究堪輿學探今古至有皓首弗克致其知者方輿雖未遍覽而所居鄉國懵然未知可乎哉京兆教授駱飛卿長安故家也嘗集先儒舊志并古人詩文從

游前輩周訪鄉老其所得者具載無遺曰曰類編長安志而廢殿荒陵離宮別館城郭之損益州郡之變更脫遺者增補訛舛者訂定駱公自序已詳之矣茲不必云較之舊志一完書爾長安古都會也是編一出或平居暇日披翫於几硯之間其周秦漢唐遺蹤故實不待諮訪一一可知足跡未及如在目前使居是邦者胸中了然問無不知亦士君子之一快也駱公用心仁矣大德戊戌夏四月中澣日前翰林直學士太中大夫安西路總管兼府尹諸軍與魯管內勸農事山木老人王利用序

大德昌國州圖志七卷

文瀾閣傳抄本

元馮復京等撰

史所以傳信傳而不信不如亡史故作史者必擅三者之

長曰學曰識曰才而後能傳信於天下蓋非學無以通古
今之世變非識無以明事理之精微非才無以措褒貶之
筆削三者闕一不敢登此職焉然而有天子之史有諸侯
之史晉之乘楚之檇杞魯之春秋是諸侯之史也後世因
之郡各有志所以備天子史官之採錄亦豈可易爲哉若
昔素王刑賞二百四十二年列國之君臣游夏不能贊一
辭司馬氏以良史才而作史記議者皆猶謂十二諸侯年
表爲殺亂於聖經然則侯邦之志亦以記事纂言也而可
易爲哉往宋末運人主好諛宰相導諛士大夫習諛內外
遂以成風操史筆者多患得患失之夫希合顧望不惟泯
其實以誣公朝之是非抑且駕其虛以騁私意之向背故
光宣埋三朝之史皆權臣黨與之蕪辭而郡縣間一時之

志亦俟牧誇張之誕筆今宋史旣與國偕亡惟志書之見
於郡縣間者版籍所計或以寡爲多風土所宜或以亡爲
有形勢所在或以險爲夷貢賦所出或以儉爲泰評人物
則多過情之譽陳民風則少退抑之辭粧飾富麗競爲美
觀詳覈其實百無一二苟上之人按其圖數其貢流毒貽
害可勝言哉昔蕭何入關收秦圖籍文書具知虛實險要
用以相漢厥功茂焉籍使今世或有踵蕭何之智信往宋
所存之記載責其實於天下郡國豈不敗乃公事余益以
悲世變之至宋獨圖書文籍一事鑿空駕僞顧不如秦之
猶爲務實而且貽禍於來世蒼生也昌國中海而處由縣
陞州而州志不作此固僕廝吏不知稽古之務而爲士者
亦有罪焉余來首訪圖經徒起文獻不足之嘆越歲餘始

於里民搆得其籍大率浮誇如前所云議欲刊削且書混
一以來之沿革既以授州之文學士屬余往吳中此事遂
廢今瓜戍已踰滯留臥疾豈其機乎乃趣學官拮據舊載
芟其蕪黜其不實定爲傳信之書使州之闕文著於所補
以俟掌建邦之六典者采焉故序作史之大略與異時文
勝其質之流弊俾二三子知所決擇而復有以告之孔子
曰吾猶及史之闕文也嗚呼史闕則紀綱將板蕩而無稽
矣是豈斯民之幸聖人猶幸闕文之及見也蓋逆知他日
諸侯惡其籍之害已而去之也今余於舊志得之既難本
復無二二三子不亟圖之余幸而受代則是籍之存於有
司者幾矣嗚呼猶欲及於闕文得乎大德戊戌七月朔日
潼川馮復京序

延祐四明志二十卷

文瀾閣傳抄本

元袁楠撰 闕卷九至十一三卷

自序曰成周疆理之制審於王畿首合同姓以夾輔至於
四履則必假異姓焉以控遏之先後䟽附曲盡其制何周
且詳也四方之志猶懼其不能以悉知也則必以外史掌
之社亡入秦而書具在區區刀筆吏獨能收其書據要漢
中夫豈偶然也哉世祖皇帝聖德神武混平寰宇首命秘
書監儒臣輯大元一統志沉幾遠略與昔聖人意旨脗合
然而郡志缺落其遺軼未備焉者不復以徹於上馬侯澤
潤之固嘗爲中祕官知之矣暨守四明乃曰明舊有經今
爲帥大府浙東七州推明爲首阨塞戶版物產地利是宜
究察以待問清風舊德與昔之高門巨閥屬於宅里者獨

可考也謂楠久為史官宜有述楠嘗聞之洙泗遺俗稽之
以久遠者道德之澤也詫緇銖之利以害於若民昔人之
所不道空虛說增農日益困甚者紀其山林屋室之盛奉
書詣庭若執符契爭莫能已是殆昔之無知者根其禍也
管夷吾作書訓子弟良厚而內政以魚鹽為急儒者詬之
維明負山橫江歲阨於水旱河渠是先牧民之本推其沿
革覽其山川知昔時得人之盛宮室戶口之無恒釋道遺
文之盛衰是皆足以增其永嘆焉者矣乃為十二考以志
其事遂不敢以荒落而有辭也馬侯為政愷悌惻隱以宜
於民民以不病郡博士吳君某勤恪承令詢索州縣之所
宜聞者良備因是得以成書焉

至順鎮江志二十一卷 抄本 從陳君子準藏本傳錄

不著授人名氏

案至順時鎮江路總管府達魯花赤曰

明里答失 至順二年六月七日代 曰狗兒 至順二年六月七日至 總管曰脫因

至順元年十一月一日至 曰兀都馬沙 至順四年正月十日至 脫因下備載祖父

名位爵諡及脫因歷官始末較他人特詳其時之參佐則
趙禹珪王傑孔世英學官則韓琪徐圓或者脫因任總管
時命僚屬所修歎始敘郡終考古凡一百門而亦冠之以
郡縣表徵引詳瞻敘述該洽土產貢賦兩門臚陳名狀尤
為賅備至于郡守參佐遠溯六朝鄉賢寓公近蒐元代與
嘉定志互相補苴是亦足以相輔而行矣

金陵新志十五卷 元至正刊本 陳眉公藏書

元前奉元路學古書院山長張鉉輯 卷首有麋公印記
郡志之見於世者多矣其間名是而實非語此遺彼者比

比皆是求其紀載有法序事詳密使人如身履其地而目擊其事者則百不一二見焉豈以其陵谷之變遷事文之繁縟故紀述有難詳與不然何其可觀者鮮若是哉甲申春淳光士張君鉉以其所撰金陵新志首藁見示其修志本末略曰首爲圖攷以著山川郡邑形勢所存次述通紀以見歷代因革古今大要中爲表志譜傳所以極天人之際究典章文物之歸終以摭遺論辨所以綜言行得失之微備一書之旨至其終又曰文摭其實事從其綱亦詳矣哉是年夏集慶路將以是編鋟諸梓上之臺僉曰善且以序見屬辭不獲命應之曰是編首藁固嘗見之而有以知其敘事之詳也使其中皆然豈不能使覽者如身履其地而目擊其事哉予聞張君博物洽聞而作事不苟於是編也容有始詳而終略者乎是夏四月初吉奉直大夫江南諸道行御史臺都事索元岱序

修志文移

修志本末

崑山郡志六卷

抄本

從陳君子準藏舊抄本傳錄

浦城楊諲纂

元成宗元貞二年升崑山縣爲州故云

郡志是書分目十五簡核謹嚴誠有如楊鐵崖序所云言博而能要事核而不蕪者惟書止六卷與序二十二卷之數不符或經後人合并歟

崑山州楊才抱其先人履祥公所著州乘凡二十二卷因其友袁華謁予錢塘曰先君嘗以州之志籍多散漫疎漏更而新之積勞於是者蓋十餘年而獲成此編今州監字

羅帖木爾將壽諸梓吾子與才系同出浦城文公十葉後
幸惠一言引諸首余謂金匱之編一國之史也圖經一郡
之史也士不出戶而知天下之山川疆理君臣政治要荒
蠻貊之外類由國史之信也不入提封而知其人民城社
田租土貢風俗異同戶口多少之差由郡史之信也然則
操志筆者非有太史氏之才孰得與於斯乎吾曩入吳竊
見公所著宋朝著龜之錄凡若干卷今之修史者購之而
未得也又有帝王圖辨素王道史姓氏通辨行于時吁公
之博學有史才可占矣宜其成是書也立凡翔例言博而
能要事核而不蕪與前邑志不可同日較工拙也且吾聞
崑山自縣陞州戶版與地利日增租賦甲天下郡縣市賈
之舶萃焉海艚之艘出焉庸田水道之利害在焉忠臣烈

女代不乏絕鴻生碩士爭爲長雄不有史才者出而任筆
削何以爲是州之信史哉吁是書之得記者今幸矣故余
不辭爲之敘抑予又聞公所著著龜爲採書使者賺而去
之而賞爵罔及焉以才之不平而公九泉之憾也故併敘
及之公諱諱字履祥東溪老人其自號云至正四年秋七
月泰定李黼榜賜第二甲進士會稽楊維禎序

崑山本縣也元成宗元貞二年升縣爲州故履祥此書有
郡志之名延祐中移州治於太倉故志中有新治舊治之
別新治今太倉州城舊治則今縣也至正中仍徙州舊治
則履祥已不及見矣鐵崖序稱二十二卷今按之止六卷
首尾完具豈鐵崖所見乃別本邪此書世罕傳本嘉慶丁
巳十月假妙士孝廉所藏舊鈔本讀之歎其簡而有要因

綴數言於末竹汀叟錢大昕

黃琴六先生手跋曰崑山郡志元楊諲撰鐵崖先生敘云
二十二卷今止風俗起至異事止十六門共六卷蓋不全
本也竹汀詹事跋云首尾完具疑鐵崖所見為別本其說
非也地志首重建置沿革輿圖城池鄉都橋梁水利戶口
賦役學校官署壇廟祠宇諸大目今皆缺而不載且楊敘
中明言崑山自縣升州戶版地利日增賦稅甲天下州縣
庸田水道利害所在而志中絕不及之其非完帙可知此
第全書之後六卷幸科第名宦人物雜記諸卷尚存足備
宋元來是邦之掌故不以殘缺忽之可耳道光甲申春正
上元日琴溪拙叟記

重修琴川志十五卷

影寫元刊本
刊本影寫

從外舅言耐德先生藏元

元盧鎮

琴川志自宋慶元丙辰縣令孫應時創修後

迨嘉定庚午縣令葉凱始廣其傳至淳祐辛丑縣令鮑廉
又加飾之然後始為成書更百餘年舊梓殘毀無遺鎮屬
耆老顧德昭等徧求舊本參考異同重鋟諸梓則鎮特因
鮑氏原本重為刊板耳非有所更定也案自序曰其成書
後凡所未載各附卷末是則凡分附卷末者皆鎮所增葺
以補鮑氏所未備者故仍題鎮名云

戴良序

至正乙巳

丘岳序

寶祐甲寅

褚中序

自序

至正癸卯

龔立本跋

崇禎己巳

明郡人盧熊輯 始沿革終集文而冠之以圖十八圖後各繫以說吾郡自吳郡志後宋章惇元趙鳳儀遞有撰述皆未克竣事盧氏芟繁撮要損益舊志勒爲成書一郡文獻釐然大備考吾郡掌故者以之繼吳郡志焉可也

吳在周末爲江南小國秦屬會稽郡及漢中世人物財賦爲東南最盛歷唐越宋以至於今遂稱天下大郡然其因革盛衰之際紀載于簡冊者自吳越春秋越絕書以下若晉張勃顧夷隋虞世基唐陸廣微等所述及元和郡縣志寰宇記各有所明迨宋之時羅處約有圖經朱長文有續記范成大趙與簋皆撰類成書厥後有章惇者病其未完作吳事類補宋亡書頗散軼元趙鳳儀爲總管嘗集諸儒

論次遺闕會改官不果成入國朝吳縣教諭盧熊閱前志之乖紛以爲苟不合而壹之恐不足示來者乃攬衆說據遺事芟繁取要族別類分爲志以述地理郡邑文學祠祀食貨兵衛之屬爲列傳以見古昔人物之美其目曰名宦名臣儒林文藝良吏忠義孝友高行隱逸而列女之節方技之良及其事有不可棄者附焉前爲畫圖以著疆域之異同後有集文以備古今之制作總之爲五十卷於是數百里之內二千載之間其事可按書而得矣洪武十一年知府廬陵李侯亨嘉是書之有繫於政也將命工刻版以傳丁內艱去已而高郵湯侯德來繼其職遂督成之熊用薦者出由工部照磨爲中書舍人以余有同朝之好請敘其首古者列國皆有史官下至州閭莫不有之朕不過記

言書事而已及漢司馬遷班固創爲序紀傳志年表之法由是四海之內無復遺事信史氏之善者也後世郡得專社稷山川之祭有政令教化之施儼如古諸侯之國固不宜無所紀述而况於吳嘗爲封國非他郡之比者哉歷漢至今雖間有所作而無完文以考其事物之全誠政之闕者也熊獨能毅朕以筆削爲己任效史漢之法損益舊典爲一郡成書豈非好古之士乎李湯二侯能知所重而圖其傳亦可謂達於政體者矣後之人覽此書治身居官取前人之成憲以爲法將見道德興而習俗美勾吳之區與鄒魯無異矣則是書之爲教不亦大哉余喜熊能急于世俗之所緩篤於好古也爲序其槩俾刻焉洪武十二年四月旣望前翰林承旨嘉議大夫知制誥兼修國史兼太子

贊善大夫金華宋濂敘

右都邑郡縣

愛日精廬藏書志卷十七

史部

地理類

水經注四十卷 舊抄校本

後魏酈道元注

是本係馮氏已倉手校黃筆塗改者據

柳大中影寫宋本也行間青筆側注者據朱鬱儀校本也

紅筆增改者據謝耳伯所見宋本也每卷末俱有馮氏題

識

馮氏題識曰校用柳僉本黃塗改者是奇事用青△朱改

亦用青佳言瑋句用黑○或△此本不誤而柳本誤者亦

用朱筆側注柳本所作之字直用紅筆增者謝耳伯所見

宋本也

又曰校閱此書俱炤柳僉宋版印抄本行間青筆炤朱堦
瑋鬱儀所校

上虞縣五鄉水利本末一卷

抄本本傳錄

從陳君子準藏明嘉靖刊

元陳恬

上虞有三湖曰夏蓋曰上妃曰白馬五鄉民

田

五鄉者永豐鄉上虞鄉宜遠鄉新興鄉孝義鄉也

實賴其利自唐迄元興廢不

一恬哀集古今沿革興復事實暨公牒訟牘歌謠碑刻以
及疏濬圍築之規啟閉蓄泄之法臚載無遺俾後之有志
水利者得以據籍而求是亦可云留心經濟者矣

井田廢阡陌開而圳澮溝洫之制隳由諸侯之去其籍也
鄭國白渠芍陂之利興沒世不忘苟求其故不有傳載亦
何所引考證此則上虞縣五鄉水利之編所宜作也縣舊
有三湖曰夏蓋曰上妃曰白馬五鄉受田之家實蒙其利

疏治圍築之規啟閉蓄泄之法自東漢逮今既詳且密間
有擅爲覆奪更易者賴載籍明白持以證據於是乎得不
泯鄉之人陳恬又懼其久而或訛也哀集古今沿革興復
事實以及誌刻左驗公規訟牘鉞梓成帙將垂不朽俾論
來者其用心亦溥矣擣求敘引噫讀禹貢而知河洛考水
經而尋源委詎不信然夫水利之在天下善用之則其施
博有考證則靡涇廢司口受民寄庸不究其利病耶是湖
也在往歲嘗有橫民獻佃于橫政者適余視師上虞亟力
止之得弗奪茲故重其請而輒序焉不徵不信有如此水
至正二十又二年秋九月望日奉直大夫温州路總管管
內勸農防禦事天台劉仁本書

士君子有天下國家之責則當思所以利乎天下國家無

天下國家之責而能思所以利其鄉者其賢亦可尙已而况所利不在於一時而有以及於後世之遠且博哉上虞陳晏如以五鄉之水利具有本末不徒輯而爲書又必刻而傳之以垂永久是其思以利其鄉於後世之意何如也蓋夏蓋上妃白馬之爲湖於上虞舊矣幸而不爲田則其鄉之利甚厚不幸而不爲湖則其鄉之害有不可勝言者利害之分較然明著奈何細人之膚見往往沒於小利率倒施之可爲浩歎此晏如所爲夙夜惓惓欲使後世長享厚利而毋蹈遺害焉予見其書而悲其意曰今而見士君子不任天下國家之責而能思於其鄉貽後世之利如斯人者遂爲題其首簡俾後世覽者於是乎尙其賢至正二十二年龍集壬寅十二月朔從仕郎江浙等處儒學提舉

楊翻序

水利芻言一卷

抄本

明常熟李卿雲撰

論開濬白茆河事

鄧韞序

正德辛巳

七世從祖果齋先生序曰吳爲澤國率多水患吏于其土者政有興廢一惟其人昔蘇文忠公爲政于吳聞單鍰善于水學訪之得其所爲書上於朝君子謂公與人爲善智也嘉謀不隱忠也式敷民德仁也頃年以來三江旣塞諸浦日微太湖奔潰罔用疏洩被患猶數且甚吾友李君瑞卿嘗有疏濬之議矣而時無文忠漫莫之省大司空李公以天子之委重講求起廢之功瑞卿右條陳二十策將上之會河南馬公以按治之職蒞吾常熟覽而趨之命有司

馳瑞卿于南以見公瑞卿水學不下於鏘而二公能以蘇公之心爲心邑大夫劉侯又樂爲之勸駕吾知是書必有遇也瑞卿遇事敢言其所論列不暇文飾操觚立就盡其所欲言而止識者謂其文直其事核有子長之遺風若其當窮居而懷世慮則又有范文正之隱憂焉者是可嘉已故爲之序以相其行正德歲在辛巳秋七月望後支川張京安書

右河渠

東南防守利便三卷 舊抄本

宋右迪功郎江南東路安撫使司准備差遣臣陳克左宣教郎添差通判建康軍府提舉圩田臣吳若同進呂祉進東南防守利便繳狀

右邊防

洛陽伽藍記五卷 先君子手抄本

魏撫軍府司馬楊銜之撰

自序

雍錄十卷 明嘉靖刊本

宋新安程大昌泰之撰

康海序 嘉靖辛卯

李經重刊序 嘉靖十一年

右古蹟

北戶錄三卷 文淵閣傳抄本 從陳君子準藏舊抄本校

唐段公路撰**崔龜圖注** 閣本姓嚴 據舊抄本補 舊抄本目錄後有

臨安府太廟前尹家書籍鋪刊行一條

陸希聲序

桂林風土記一卷 舊抄本

唐銀青光祿大夫檢校左散騎常侍使持節融州諸軍事

守融州刺史莫休符撰

自序 光化二年

岳陽風土記一卷 明嘉靖刊本 葉石君藏書

宋宣德郎監岳州在城酒稅務范致明撰 卷首有葉石

君印記

徐學謨序 嘉靖癸亥

陸瑯跋 嘉靖甲辰

六朝事迹編類二卷 舊抄本 汲古閣藏書 臨馮氏寶伯校

宋新安張敦頤編 卷首有毛子晉斧季印記

建康禹貢揚州之域斗牛分野在周為吳在春秋末為越

曾哀公二十二年 越王句踐滅吳 自越之後一百四十年為楚 周顯王三十六年楚

滅 越自楚之後一百一十年為秦 楚王負芻五年為秦 初楚

威王因山立號置金陵邑 或云以此有王氣因埋金以鎮 之或云地接金壇之陵故謂之

金陵今石 頭城是也 及秦兼諸侯分天下為三十六郡以金陵屬鄣

郡 故鄣為今 吳興郡也 時望氣者云五百年後金陵有天子氣始皇

東巡乃鑿鍾阜斷金陵長隴以通流改其邑為秣陵縣 秦

縣陵縣在今府城直 南六十里秣陵橋 漢武帝元封初廢鄣郡置丹陽為秣

陵縣初漢置揚州治無定所輿地志云先理歷陽後理壽

春其後又徙曲阿漢建安十六年孫權自京口徙治秣陵

明年城石頭改秣陵為建鄴晉太康初廢建鄴復為秣陵

愍帝諱業即改為建康元帝即位以建康太守為丹陽尹

宋齊而下咸都於此焉隋平陳廢丹陽郡乃於石城置蔣州併秣陵建康同夏三縣入江寧縣唐武德二年爲揚州東南道行臺置尙書省輔公祐據江東七年平又改爲蔣州八年罷行臺稱揚州大都督府領上元金陵句容丹陽溧水等縣九年移揚州治江都改金陵爲白下縣屬潤州正觀七年復爲揚州乾元元年改爲昇州上元二年廢光啓三年復仍以上元句容溧水溧陽四縣隸之置節度使天祐四年楊行密據其地爲金陵府號曰齊國封李昇爲齊王以建康爲西都以廣陵爲東都昇僭位國號唐二主在位共二十三年皇朝開寶八年平之復爲昇州天禧二年改江寧府建炎三年改建康府此金陵郡邑升降廢置之不常也余因覽圖經實錄疑所載六朝事尙有脫誤乃取吳志晉

書及宋齊而下史傳與夫當時之碑記參訂而考之分門編類綴爲篇目凡十有四卷雖猥陋無益於治道然展卷則三百餘年興衰之迹若身履乎其間非徒得之於傳聞而已同志之士盍補其所未備者而傳之紹興歲次庚辰八月左奉議郎充江南東路安撫司幹辦公事新安張敦頤序

高陽許嵩作建康實錄文多汗漫參考者疲於省閱新安張養正哀舊史而爲六朝事迹編類部居粲然俾江左三百餘年之故實名布方冊非博雅好古未易成此書也余叨守建康養正適以議郎居幕府因取其書刊於此邦養正名敦頤婁專侯泮以文章道義爲學者之所矜式此特餘事爾紹興庚辰立冬日東魯韓仲通書

是書摭拾遺事分別條理洵是作手然引據失實加以王謝作王榭之類不免爲識者所嗤且語氣頗似不文今人耳食相尙至以此爲奇書家錄一冊沾沾自喜不暇校讐至有脫落數行增入助語以來注作正文備書之弊也癸巳之夏借得宋刻亟爲勘對復見是編面目然後冊已是印抄本子不能復見完璧矣虞山馮武識

會稽三賦三卷

明初刊本

述古堂藏書

宋東嘉王十朋撰剡谿周世則注郡人史鑄增注 卷首有錢遵王印記

會稽之山川風物載于圖經地志者固不少也然人一一泛觀則興易盡屑屑徧讀則神且疲儻非有所去取纂次成文焉能資於玩繹紹興間詹事王公以射策魁多士入

官越幕資治之暇乃於圖志掇其奕奕之事迹

志謂輿地志之類今

賦注所引惟會稽志一書非先生作賦之前所有者

加以舊傳新覩可紀之事從類

鋪張著爲風俗賦以抑揚品藻寫於答問其事實其詞瞻旨趣明暢字字淵源誠爲傑作公之究心可謂平章風物之宗主其有光於吾邦者大矣及賦民事堂蓬萊閣文皆醇正語亦高妙其有見於奉君命紀勝槩者備矣吁昔人所言擲地作金聲者豈得專其美哉竊惟風俗一賦雖有剡溪周君之注惟以表出山川事物爲意而公之文章以經史百家之言盤屈於筆下者殊未究其根柢暨民事蓬萊之作其注又缺然無聞遂使覽者惜其未備鑄平日陪公之文至於成癖由是不揆蕪淺輒皆爲之注雖未必一一盡得公之本意且以補周君遺闕至其間固有闕畧詳

備之不齊者然而意各有所謂闕謂故闕不注者如西子王室風騷遺跡德教民事

如話言處子多士舞干戚一統甄陶九重之類是也大

率事涉於隱者則從詳備目熟乎見者則從闕略蓋非徒

事夫繁文而貴夫有以證明也李善注文選云諸引文證

祖述愚今注賦亦本此意然間有於事不切者恐其繁若

夫士大夫居是邦遊是境則是賦也不可以不知其或外

此者苟能一日則不必上會稽探禹穴不必投剡中登天

姥其若耶雲門又不必青鞋布襪也或從官于此則鏡湖

秦望之遊亦不必月三四焉况人材風俗與夫登覽之勝

班班靡不具在俾盛傳於世豈曰小補哉凡讀之者嘗患

乎奇字之為梗從而為釋音區布於句讀之下凡檢類篇

者據夏英公古文四聲韻為音庶幾不俟討論可以助眼

過電而口傾河也區區注釋之意於是乎併書時嘉定歲

在丁丑日長至愚齋史鑄序

莆陽比事七卷抄本從陳君子準藏舊抄本傳錄

宋龍坡李俊甫幼傑纂輯是書仿急就篇蒙求體取莆

陽山川風俗古迹名勝人物科第道流釋子彙聚科分括

以四言韻語幼傑自為之注蓋地志創格也所採如紹熙

莆陽志長樂志信安志游洋志清源志泉南錄南恩圖經

本朝元輔表中興百官題名志閩川名士傳唐登科記五

代登科記離塵不夜編劉夙手記鑑明錄等書多他書所

未見者雖稍有殘闕亦足為莆陽文獻之徵也

陳讜序曰吾莆山川清淑風俗醇美民生其間率多秀異

恥事末作一歸於儒自唐距今歷紀數百如節行揚芳文

學垂範代不乏人進士擢第則有祖孫首榜魁亞聯名異
科有賢良詞學之英一門有公卿岳牧之盛至於軼材絕
藝隱士高禪間見軼出殆難悉數固炳靈之助亦漸靡使
然也舊誌間多疏略由夫主其事者期於速成操觚之士
不暇博訪遂使覽者不無遺憾今國家貢士李君俊甫幼
傑慨然有志斯事上考史記旁摭紀錄下至諸家文集行
實碑碣書尺悉從采掇詢于耆儒參諸故老積十餘年心
目之勤釐爲七卷幾數萬言彙聚科分聯比而書又爲綱
目于前偶儷成編尤便披閱可謂勤矣書成適國子博士
三山林公來牧吾郡李君以其書獻一見嘆賞命書史就
抄給以筆札不閱月而畢親翰抵僕諉以序讜竊自念齒
耄學荒理當推避旣而喟然謂士未遇時往往編綴古今

以爲選舉之圖講學鬻文以爲俯仰之計奚暇採拾鄉閭
逸事以爲前輩不朽之傳後來慕用者之勤也哉是書之
成若不遇博雅君子爲賞覽但藏巾笥耳今使君仁賢不
薄鄉郡樂其風土之美人物之盛爲之主盟將以傳信久
遠使後人更相勸勵斯爲忠孝冠冕言行楷式之歸風化
美意實在乎是何此書之幸吾郡之逢耶使君以鼎甲師
儒宜爲序冠顧乃謙抑以筆授僕若又固辭恐幼傑用心
之勤與使君樂善之懿終無以表見是題于卷首云

僕至郡之三月李君幼傑來訪出其書一編閱之莆陽比
事綱目也其言纔千有餘其事上下千百年間可法可勸
可喜可愕無所不有於是嘉其工歎其勤也命工就錄全
帙延訪儒生往復訂正凡踰年而書始成乃銀木以傳後

吁僕之力僅止是耳如此山川人物方興而未艾高蹈而遠跨者又將月異而歲不同也幼傑勉乎哉僕老矣自是休影衡茅之下萬事棄置行樂餘暇時懷此郡好風南來每聞述一佳話往往得解顏而笑蓋於此興復不淺嘉定甲戌四月下澣玉融林瑑書于儒雅堂

武林舊事十卷

舊抄本

宋泗水潛夫輯

自序

武林舊事乃弁陽老人草窻周密公謹所集也刊本止第六卷山中仇先生所藏本終十卷後歸西河莫氏家余就假于莫氏因手鈔成全書以識歲月藏于家塾至元後戊寅正月忻厚德用和父

此書二冊予假于太子大保遂安伯陳公家同年友文部副郎黃君廷用錄之以歸予云宏治乙卯夏四月望從靖手跋

遵王抄本前六卷舊抄缺後四卷命工寫足黼季假得既屬竇伯校此又浼余校一過頗有是正處朱筆出竇伯手墨筆蓋余所校也此本係余姻友孫岷自舊藏岷自不祿屈指已十有三年矣撫此不勝人琴之痛康熙丁巳小春下浣覲菴陸貽典識於山涇老屋

武林舊事六卷

明正德刊本

宋四水潛夫輯

宋廷佐刊板跋

正德戊寅

留志淑跋

同上

右雜記

游志續編一卷抄本

南村居士陶宗儀九成編 前有宋天台陳仁玉游志

編序并目是書繼仁玉游志編而作故云續編所載皆唐宋金元人游覽之文頗有世不經見者如劉祁游西山記北使記等篇他書俱未之載其存佚之功爲不小矣至李格非洛陽名園記范成大驂鸞錄吳船錄蓋以世有傳本故存其目而未錄其文非有所殘闕也

淳祐癸卯置閨在秋景氣極高迴望屋角山光與天合碧左右蠹蠹獻狀似相招相延竚有不勝情者而余適病趾弗能遊焉時獨鴛首引酌誦遠遊招遊諸篇以自宣暢因懷自古山川之美人物之勝登覽遊從之適雖其有得於

是有感於是者不能盡同而皆超然無有世俗垢氣物欲之累意謂古今樂事無過此者乃取自咏沂而下二千載間迄於近世張朱氏衡山之游高情遠韻聚見此編若身參其間而目與之接胥應和而俱翱翔也吁世亦有好遊若予者乎旬有五曰編成是爲序天台陳仁玉

辛酉九月望偶過孔嘉兄雲光閣見有此本在几上云是借陸元洲者遂爾袖歸燈下錄之以爲齋中卧遊之玩少俟閒暇盡將載籍所傳遊覽諸作錄之以續二公之不足未知遂此志願否令徐問之襄完併記十一月朔錢穀

游志續編一册錢罄室先生手鈔本子假于長塘鮑君以文命胥錄之古人于小碎文字編之錄之不遺餘力若此惜陳氏初編僅存其目異日當一一按目補之也乾隆丙

戊秋七月晦日吳翌鳳志

明錢罄室手鈔游志續編吳郡陸白齋先生所貽吳君菴借錄未還出游踰十稔不歸家所藏書散失殆盡此書幸為黃孝廉蕘圃所得予輟元刻道園遺稿易之不可則以枚菴手鈔本歸予予喜過望如獲瓌寶舊本不復置念矣枚菴書法秀逸手書秘冊幾及千卷他所收儲亦皆善本今之錢罄室也一旦化為煙雲其歸也蓋有大難為懷者矣展卷歎息久之嘉慶甲子十一月望通介叟鮑廷博識于知不足齋

右游記

宣和奉使高麗圖經四十卷

舊抄本

毛斧季照宋刊本手校

宋奉議郎充奉使高麗國信所提轄人船禮物賜緋魚袋

臣徐兢撰

後附張孝伯撰兢行狀末卷儒學雞林之人

引領嘆慕至以下明海鹽鄭休仲本脫一葉鮑氏本同此本據宋槧校補二百五十三字可稱完善每卷俱有虞山

毛辰手校印記

自序

宣和六年

徐藏刊板跋

乾道三年

毛氏手跋曰此本抄手最劣且多錯簡久置不觀甲申五月從宋中丞借得宋槧本自六月十五日校起時方校訂詩詞雜俎鳩工修板因多間斷至七月二十三日方畢他日從此錄出可稱善本矣惜宋本亦缺三葉無從是正爾

二卷四八
卷五六

虞山毛辰識

島夷志畧一卷

文瀾閣傳抄本

元汪大淵撰

九州環大瀛海而中國曰赤縣神州其外之州者復九有裨海環之人民禽獸莫能相通如一區中者乃爲一州此騶氏之言也人多疑其荒唐誕誇况當時外徼未通於中國將何以徵驗其言哉漢唐而後於諸島夷力所可到利所可到班史傳固有其名矣然考於見聞多襲舊書未有所身遊目識而能詳記其實者猶未盡徵之也西江汪君煥章當冠年嘗兩附舶東西洋所過輒采錄其山川風土物產之詭異居室飲食衣服之好尚與貿易賚用之所宜非其親見不書則信乎其可徵也夫言海中自多鉅魚若蛟龍鯨鯢之屬羣出遊鼓濤鉅風莫可名數舟人燔雞毛以觸之則遠遊而沒一島嶼間或廣袤數千里島人浩穰其

君長所居多明珠麗玉犀角象牙香木爲飾橋梁或甃以金銀若珊瑚琅玕玳瑁人不以爲奇也所言由有可觀則騶衍皆不誕焉知是誌之外煥章之所未歷不有瑰怪廣大又逾此爲國者歟大抵一元之氣充溢乎天地其所能融結爲人爲物惟中國文明則得其正氣環海於外氣偏於物而寒燠殊候材質異賦固其理也今乃以耳目弗逮而盡疑之可乎莊周有言六合之外聖人存而不論然博古君子求之異書亦所不廢也泉修郡乘旣以是誌刊入之煥章歸復刊諸西江以廣其傳故予序之至正十年龍集庚寅二月朔日翰林修撰河東張翥序

中國之外四州維海之外夷國以萬計唯北海以風惡不可入東西南數千萬里皆得梯航以達其道路象胥以譯

其語言惟有聖人在乎位則相率而效朝貢通互市雖天際窮髮不毛之地無不可道之理焉世祖皇帝既平宋氏始命正奉大夫工部尙書海外諸蕃宣慰使蒲師文與其副孫勝夫尤永賢等通道外國撫宣諸夷獨瓜哇負固不服遂命平章高興史弼等帥舟師以討定之自時厥後唐人商販者外蕃率待以命使臣之禮故其國俗土產人物奇怪之事中土皆得而知奇珍異寶流布中外爲不少矣然欲考求其故實則熟事者多祕其說鑿空者又不得其詳唯豫章汪君煥章少負奇氣爲司馬子長之遊足跡幾半天下矣又以海外之風土國史未盡其蘊因附船以浮於海者數年然後歸其目所及皆爲書以記之較之五年舊誌大有逕庭矣以君傳者其言必可信故附錄清原續志之後不惟使後之圖王會者有足徵亦以見國家之懷柔百蠻蓋此道也至正己丑冬十月又二望日三山吳

鑿序

清源續志序曰古有九邱之書誌九州之土地所有風氣之宜與三墳五典並傳周列國皆有史晉有乘輿楚有檣杙魯有春秋是也孔子定書以黜三墳衍述職方以代九邱筆削春秋以寓一王法而乘輿檣杙遂廢不傳及秦罷侯置守廢列國史漢馬遷作史記闕牧守年月不表郡國記載浸無可考學者病之厥後江表華陽有誌汝潁之名士襄陽之耆舊有傳隋大業首命學士十八人著十郡誌凡以補史氏之闕遺也閩文學始唐至宋大盛故家文獻彬彬可考時號海濱洙泗蓋不誣矣國朝混一區域至元

丙子郡既內附繼遭兵寇郡城之外莽爲戰區雖值承平
未能盡復舊觀清源前誌放失後誌上於淳祐庚戌逮今
百有餘年前政牧守多文史武夫急簿書期會而不遑於
典章文物比年修宋遼金三史詔郡國各上所錄而泉獨
不能具無以稱德意有識愧焉至元九年朝以閩海憲使
高昌傑侯求守泉臨政之暇考求圖誌見是邦古今政治
沿革風土習尚變遷不同太平百年譜牒猶有遺逸及今
不紀後將無徵遂分命儒生搜訪舊聞隨邑編輯成書鑒
時寓泉辱命與學士君子裁定刪削爲清源續誌二十卷
以補清源故事然故老漸愚新學淺於聞見前朝遺事蓋
十具一二以傳焉至正十一年暮春修禊日三山吳鑒序
右外紀

卷十七終

愛日精廬藏書志卷十八

史部

職官類

大唐六典三十卷

明正德刊本

唐元宗

御撰集賢院學士兵部尚書兼中書令修國史上

柱國開國公臣李林甫等奉勅注上

詹棫題識

紹興四年

王鏊重刊序

正德乙亥

麟臺故事三卷

抄本

從吳門黃氏藏本傳錄

宋

紹興元年七月朝請郎試秘書少監程俱記 伏讀

欽定四庫全書總目云是書自明以來自說郭所載數條外別

無傳本惟永樂大典所載頗爲繁夥排比條貫猶可成書

原本五卷十有二篇今篇名散見於永樂大典中者曰沿革曰省舍曰儲藏曰修纂曰職掌曰選任曰官聯曰恩榮曰祿廩祇存其九謹依類哀輯仍爲五卷云云此本凡三卷闕四五兩卷蓋不完本也卷一曰官聯曰選任卷二曰書籍御製御書附曰校讎卷三曰修纂曰國史凡六篇與武英殿聚珍本命篇敘次多有異同又篇名見永樂大典者凡九而此本所載書籍校讎國史不與焉合之恰十有二篇俱足以資參考前有紹興元年尚書省劄一通中如凡十有二篇及繕寫成二冊等字俱缺又改分爲五卷爲三卷併於每卷填上中下字蓋影寫者欲泯其不全之迹故不惜多方作僞耳原本末頁有錢叔寶題識云隆慶元年八月十日蘇州府前杜氏書鋪收蓋從錢磬室藏本傳錄

者

中興館閣錄十卷續錄十卷

舊抄本

續錄不著撰人名氏

闕卷一沿革續錄闕卷

九祿廩

中興館閣錄十卷淳熙四年秋天台陳騏叔晉與其僚所共編集也上世官修其方故物不坻伏後世弗安厥官置方莫修職業因以放失夫方云者書也究其本原事迹及朝夕所當思營者悉書之法術具焉使居是官者奉以周旋雖百世可考爾周官三百六十官各有書小行人適四方則物爲一書多至五書蓋古之人將有行也舉必及三惟始衷終依據審諦則其施設斯可傳久彼狡焉滅棄典籍縱意自如幸闕六龍駐蹕臨安踰四十年三省樞密院

制度尚稽復舊惟三館祕閣巋然傑出非百司比自唐開元韋述所集記注元祐間宋宣獻之孫匪躬作館閣錄紹興改元程俱致道作麟臺故事宋氏皆祖韋氏而程氏故事并國初它則多闕蓋未知其有宋錄也惜最後四卷俄空焉余屢蒐采弗獲欲補又弗暇每每太息今所編集第斷自建炎以來凡物巨細靡有脫遺視程氏誠當且密官修其方行古道者不當如是耶昏忘倦游喜見此書乃援筆爲之序李燾仁父

續錄序曰中興館閣錄淳熙四年成書其後附錄者多訛舛缺略嘉定三年十月重行編次是正訛舛其缺略者增補之名曰館閣續錄逐卷之末不題卷數貴在他日可以旋入繼今每於歲杪分委省官取歲中合載事略加刪潤

刊於卷末前錄凡例其目有九今並從其舊云

宋宰輔編年錄二十卷

明刊本

汲古閣藏書

宋太常博士徐自明著 卷首有毛子晉印記

本朝大詔令登載相麻不及執政之制宰輔拜罷錄僅紀歲月名氏而揚廷之命無述焉覽者病之故太常博士徐君自明纂成宋朝宰輔編年錄二十卷首起建隆庚申至于嘉定乙亥凡二百五十餘年本之以長編繫年錄緯之以大詔令拜罷錄與夫玉堂制草諸書而一時黜陟之由羣公評品之論奉常行實之攷旁引曲彙靡有漏略其用心亦勤矣夫一代之盛則有一代之元勳碩輔鉅德豐功銘于烝口燹鼎書于旂常竹帛固不待贅述其間賢佞進退正邪消長闕于世道泰否者瞭然一覽之頃辭令云乎

哉彼齊魯大臣史失其名漢相列傳獨書免冊是編也其亦足爲信史羽翼歟君之子居誼宰永陽有廉稱輟奉餼梓于學可謂能成先志者我宋億萬年無疆惟休臣亦有無窮之聞續而書之未有艾云寶祐丁巳清明寶章閣學士通議大夫提舉隆興府玉隆萬壽宮嘉興縣開國子食邑六百戶陸德輿序

永嘉徐常博自明作宋朝宰輔編年錄其子永陽邑大夫居誼刊之于梓謁序于予予曰宰輔者安危治亂之所寄也漢四百年稱蕭曹丙魏唐三百年稱房杜姚宋豈不憂憂乎其難矣哉國朝自建隆以至嘉祐趙韓王普李公昉宋公琪張公齊賢呂公蒙正呂公端李公沆向公敏中畢公士安寇公準李公迪王公旦王公會晏公殊杜公衍富

公弼文潞公彥博韓忠獻王琦又何其彬彬然盛也中間不幸而王安石相姦庸相繼庸則陳升之吳充韓絳姦則王珪蔡確韓縝元祐更化幸而有司馬文正公光呂正獻公公著范忠宣公純仁數人又不幸而章子厚相姦凶復相繼蔡京過于章子厚王黼過于蔡京若曾布趙挺之何執中劉正夫余深鄭居中微不及子厚京黼造禍者姦成禍者庸禍極于吳敏何桌輩而不可制矣若二人者又姦庸相半者也嗟夫人耶天耶天將開建隆以來之治故名臣相項背天將兆靖康之禍故姦凶接武李公忠定綱言驗于疏水功驗于圍城高皇帝以其爲命世之英而相之不越七十有五日間之者黃潛善也忠定昭武人潛善亦昭武人並生而並相豈非天平潛善罷忠定亦竟不得志

趙公鼎張公浚忠定之亞也相皆不得久而久于其位者
秦檜也忠定張趙敵所惡也檜敵所喜也其久其近天意
可知矣自後相有可稱者陳公康伯陳公俊卿趙公汝愚
而已中興而後又何其太寥落耶侂冑之徒則世目以爲
京檜者也賢者則不見久而侂冑之徒皆得久于其位此
豈人耶子嘗論三代而上伊傅周召皆以儒者相大儒如
孔子不過攝相而已孔子而後以儒得相者惟司馬文正
公豈非盛哉然亦不得久向若神宗以所以待安石者早
相司馬公及程公顥天下豈不被儒相之福耶論皇宋宰
輔者每爲之三太息常博之爲是錄也于美惡皆不沒其
實賢于世之類書多矣寶祐五年日龍圖閣學士朝奉大
夫新知西外宗正事趙 下缺

故太常博士徐永嘉之經師宿儒容止靖嚴言悉中節
行不越矩論著滿室蠅頭手筆無一字不端楷皆有益于
世教其錄宰輔也昉時年十八九執冊應對其間粗審顛
末後三十餘歲欲板于三山郡齋而未果會公之子居誼
來宰永福政成能以俸金刻之縣學爲一代之盛典可敬
也公字誠甫號慥堂終零陵郡守云寶祐五年五月五日
朝散郎集英殿修撰提舉建寧府武夷山冲佑觀永嘉縣
開國男食邑三百戶賜紫金魚袋陳昉謹書

司馬溫公旣體春秋左氏傳爲編年一書又欲做班史敘
宋興以來百官沿革公卿除拜作百官公卿表以便省覽
今觀徐公編年惟及宰輔而百官不及則于省覽爲尤便
宋朝歷代名德布滿百職輝映史冊先後相望溫公猶思

表而出之夫豈不足于夷攷而公之編年曰姑舍是非略也媿諸作室之工書于棟者惟都科匠與副之而梓人不與焉公之編年意或以是夫大臣之進退臧否國之否泰繫焉關涉至大故公之爲此書也自建隆庚申訖嘉定乙亥其間元臣碩輔誥命所褒建議所否出處之顛末德業之污隆長編繫年所不載拜罷錄年表所不具而雜出于他書旁搜遠括靡有遺棄釐爲卷帙用工雖勤然操其樞要舉其宏綱賢于勞而寡要者遠矣談者咸謂是書之成可觀世道吁豈惟是哉觀慶厯之盛則杜富韓范之事業在所勉觀熙豐之事則荆舒之學在所懲下不負所學則景行先哲區別邪正以不寅亮之規上不負吾君則追法前猷吹蜚往徹益謹乎若時登庸之道則是書有補于世

所以續皇家萬億年無疆之休自此編年始真作宋一經者也公諱自明嘗爲太常博士子居誼宰永陽以廉名鳴琴之暇取家藏之秘銀于邑序使垂世懿範不至無傳厥功不在編年下寶祐丁巳八月朔中奉大夫福建路轉運判官章鑄序

文瀾閣傳抄本

祕書監志十一卷

元王士點商企翁撰

右官制

作邑自箴十卷

抄本

從陳君子準藏本傳錄

宋李元弼撰

述爲政之要論莅民之方極爲核備雖篇

帙無多而條目詳盡區畫分明固司牧者之矜式也末卷曰登途須知曰備急藥方亦行路所必需者直齋書錄解

題文淵閣書目世善堂書目俱著錄末頁有淳熙己亥中
元浙西提刑司刊兩行蓋從宋刊本影寫者
嘗謂子男之任實難其人漢之郎官出宰百里聖朝鼎新
法度以達官稱薦者錄之予濫綰銅章才微識隘何以承
流宣化民社之重可不勉焉剽聞鄉老先生論爲政之要
僅得一百三十餘說從而著成規矩述以勸戒又幾百有
餘事釐爲十卷目之曰作邑自箴置之几案可以矜式政
和丁酉秋七月李元弼持國待次廣陵書

西序

官箴一卷

明成化刊本

宋紫微舍人呂本中居仁著

邢讓重刊跋

成化戊子

右官箴

愛日精廬藏書志卷十八終

愛日精廬

愛日精廬藏書志卷十九

史部

政書類

太平寶訓政事紀年五卷

抄本

不著撰人名氏

是書以富弼三朝政要林希兩朝寶訓

為藍本而益之以國朝會要事實類苑等書始太祖太宗高宗稱高宗為太上皇帝蓋孝宗時人所編輯也太祖太宗真宗三朝每年後俱有臣弼等釋曰云云蓋即陳振孫所謂每事之後各釋其意也文淵閣書目著錄

此書迺將富公弼所進太祖太宗真宗三朝寶訓

案富弼所進乃

三朝政要非寶訓也此蓋沿館閣書目之誤

及林公希所進仁宗英宗兩朝寶

訓及國朝會要事實類苑編年之書與夫建隆以迨紹興

詔令旨揮歷朝名臣章奏之集言行紀錄搜括殆盡以成是編庶幾開卷一覽則我祖宗盛德大業厚澤深仁爛煥乎其溢目豈小補哉伏幸詳鑒

直齋書錄解題曰三朝政要二十卷宰相河南富弼彥國撰慶歷三年弼爲樞副上言選官置局以三朝典故分門類聚編成一書以爲模範命王洙余靖孫甫歐陽修同共編纂四年書成名太平故事凡九十六門每事之後各釋其意至紹興八年右朝議大夫呂源得舊印本刊正增廣名政要釋明策備上之於朝館閣書目指政要爲寶訓非也

玉海曰慶歷三年九月樞密副使富弼請考祖宗故事可行者爲書置在二府俾爲模範得以遵守上嘉其奏丙戌命史館檢討王洙集賢校理余靖歐陽修秘閣校理孫甫等同編命弼領之名曰太平故事四年九月上之凡九十六門二十卷弼爲序凡三朝賞罰之權威德之本責任將帥之術升黜官吏之法息費強兵之制禦戎平寇之畧寬民恤災之惠睦親立教之本御臣防患之機察納諫諍之道率編錄焉

又曰元豐五年六月八日戊午宰臣王珪言天聖中修眞宗正史別錄三朝寶訓以備省覽今當修仁英兩朝寶訓詔吏部郎曾肇著作佐郎林希編修至六年四月十九日書成凡二十卷希上之賜銀絹二百始於孝德終於治夷分七十六門右寶訓

唐會要一百卷

舊抄本

宋推忠協謀佐理功臣光祿大夫守司空兼門下侍郎同中書門下平章事監修國史上柱國太原郡開國公食邑二千戶實封四百戶臣王溥纂

建炎以來朝野雜記殘本六卷

宋刊本

宋李心傳撰

板心有記乙十及十一至十五等字蓋乙

集卷十至卷十五六卷也卷十一曰時事卷十二曰故事卷十三十四曰雜事卷十五曰官制分卷與聚珍本異是本首尾卷數俱經刊改妄填一二三四五六等字幸板心未動得以考見原書卷第據之更正云

文獻通考三百四十八卷

元刊元印本

宋鄱陽馬端臨貴與著

自書契至唐而通典成至宋過江而通志略成過江文獻

家惟扶風氏久上下數千年幽者屋壁叢者棟宇書市罕值寒窻少儲用之階庭焉磅礴鬱積次第增損近始嘉定遠接天寶泝而上之於是過江四丁未矣而通考又成三書在宇宙間皆不可闕若通攷鳩倂粹精芟夷蕪翳宿疑解駁新益盈涌自爲一家昔顧子敦恨不伊川入山讀通典有爲而言之也漁仲進通志詔許於三館借書務觀謂館中諸公皆不樂以館中所有而易所無豈非快事一時名勝狹中乃爾邪史筆志最難此書疑延壽史無志故南北日食多異同予見舊唐書張太素撰魏志百卷志天文則其姪一行一行嘗追步日食至于春秋視七十九如發矇耳今亡矣夫中州集蔡珪補南北志六十卷珪懋之孫松年之子他著述稱是河洛多好古君子時代未遠倘或

可求使延壽無遺憾吾按延壽自爲南北史預修晉史一人之身尙相抵牾晉志璽文八字晉也而謂之秦卒述傳郭元建所郵強加以秦八字若太平真君七年出佛像者二真秦也旁又鐫曰魏所受漢夫真秦旣彼留則江左非其晉耶而滄之耶李心傳僂指於慕容小差仍欠質佛像是非變化如蟠螭者何限安得二志忽焉呈現以爲君書之助王肅魏中蘇綽魏末從周變夏華風丕粲君有意乎君文獻故家考制度於江左斯文極盛七餘禮補綴以朱黃史錯綜以呂葉深尋以真魏遠騁以周洪陳陳相因且唯唯且否否舊編屢脫初藁頻抄神識晶熒顛末完整不然何以瞻勇於君卿漁仲之旁而睨其後哉使老先生及見帙端數語當益徂益崇如拔地倚天森羅萬象照耀杲杲而予也何足以知之何足以知之以君下問之勤也不敢以不能爲解君故相國番易公仲子至大戊申七月旣望鄱陽公門下士李謹思序

自序

王壽衍進書表

延祐六年

饒州路總管府下樂平州刊印通考指揮

至治二年

鄱人宋相子馬端臨述文獻通考于家泰定元年江浙省彫寘于西湖書院越十有一年予由太史氏出統學南邦因莅杭閱究其文或譌或逸版咸有焉時端臨旣沒厥壻楊元長教于東湖乃俾造厥嗣志仁詢取先文用正斯失至則就俾元偕西湖長方員率學者正之踰年而訖將圖正于梓未諧又踰年中書遣太常陳氏來訪求典籍于茲

行中書以其事惟予是任乃克遂舊圖俾儒士葉森董正
梓工且足于不逮必予復省功乃已幸獲底于備可觀烏
呼考之述繼世而成歷代而行踰十年而徵又三年而明
匪易匪輕可戒于德之不恒至元又五年三月朔江浙等
處儒學提舉余謙敘紀

大唐開元禮一百五十卷

抄本

唐蕭嵩等奉敕撰

周必大序曰三代以下言治者莫盛於唐故其議禮有足
稽者始太宗文皇帝以濬哲之姿躬致上治顧視隋禮不
足盡用乃詔房元齡魏徵與禮官學士增修五禮成書百
卷總一百三十篇所謂正觀禮是也高宗纂成之復詔長
孫無忌杜正倫李義府以三十卷益之然義府輩務爲傅

會至雜以令式議者非焉所謂顯慶禮是也二書不同蓋
嘗並用春官充位莫之或正開元皇帝綏萬邦撫重熙於
是學士張說奏言儀注矛盾蓋有以折衷之乃詔徐堅柳
銳施欽本載加撰選繼以蕭嵩王邱仲等歷數年乃就號
曰大唐開元禮吉凶軍賓嘉至是備矣書必有序序所以
爲作者之意禮書一代之典也其可闕耶謹爲序曰夫爲
國必以禮以時爲大商之去夏未久也其損益已可知矣
况乎自秦迄漢典籍殘缺所可見者二戴之記周官之書
其綱則備其紀則畧二戴之記雜出於漢儒或繁密難遵
或牴牾莫辨此泯泯紛紛所以無敢輕議也雖然大輅沒
而椎輪不可以復用宮室備而茅茨不可以復拘若明堂
以致嚴父之孝孝致矣則汶上之圖不必盡合於黃帝圓

邱以竭事天之誠誠竭矣則澤中之祀不必盡合於成周
蓋古今之不同文質之適變雖先王未之有者可以義起
奈何區區殘編斷簡泥古而窒今使我朝盛典不傳於後
世耶唐受命奄有方夏吉禮以事神祇賓禮以親邦國嘉
禮以親萬民不得已而施之軍禮凶禮者甚衆也朝廷之
所用有司之所守非一定之論則內外無所適從非不刊
之書則子孫無所取法今自正觀而至顯慶閱歲未久二
禮之不同固未害損益之義也然既出義府傳會則非所
謂一定之論猥雜有司令式則非所謂不刊之書開元皇
帝勵精政治有意太平故能遴擇儒臣釐正鉅典惟堅等
辨博通貫體上之意故能不泥不肆克輯成書因時肇興
朝廷有大疑不必聚諸儒之訟稽是書而可定國家有盛
舉不必野外之謀卽是書而可行世守之母敢失墜不其
休哉書凡百五十卷各以類從讀者如按圖而知四方此
不具載姑敘作書之旨云謹序

大唐郊祀錄十卷

抄本

從錢唐何氏藏本傳錄

唐朝散郎前行河南府密縣尉太常禮院修撰臣王涇上

卷一至三曰凡例卷四至七曰祀禮卷八曰祭祀卷九

卷十曰饗禮凡例者如辨神位視牲器卜日齋戒玉帛牲

牢奠獻祈禱祭服雅樂雜例之類是也祀禮者如冬至祈

穀雩祀明堂朝日夕月風師雨師靈星五龍及五方感生

帝九宮貴神之類是也祭祀者如皇地祇神州地祇太社

太稷嶽鎮海瀆之類是也饗禮者如薦獻太清宮

元元皇帝宮

薦獻太廟德明皇帝等廟

天寶三載追尊皇帝陶爲德明皇帝

及先農先蠶

文宣王武成王先代帝王之類是也稽歷代郊祀之制述有唐沿革之由中如祀九宮貴神於東郊升風師雨師爲中祀及嶽鎮海瀆之封爵風雨雷師之樂章俱開元禮所未及載者一朝典制籍此可補其闕注中所引三禮義宗多有他書所未見者亦足以資考核有志於經史之學者宜亦共知寶貴哉表云神位升降寫而爲圖今其圖已佚無可考矣崇文總目通志直齋書錄解題文淵閣書目俱著錄

王涇上表

直齋書錄解題曰大唐郊祀錄十卷唐太常禮院修撰王涇撰考次歷代郊廟沿革之制及其工歌祝號而圖其壇屋升降之序貞元中上之

太常因革禮一百卷

抄本

宋推忠協謀佐理功臣光祿大夫行尚書吏部侍郎參知政事上柱國樂安郡開國公食邑三千三百戶食實封八百戶臣歐陽修等奉勅編案宋太祖始命劉溫叟等約唐貞觀顯慶開元禮爲開寶通禮更太宗真宗隨事損益天聖中禮官王暉等論次其事名曰禮閣新編其後賈昌朝等復加編定名曰太常新禮嘉祐中修以二書不能兼收博采未足以示後世且二書之外存於簡牘者尙多付之胥史日以殘脫乃建編纂禮書之議仁宗允其請嘉祐六年命蘇洵姚闢置局修纂治平二年書成賜名太常因革禮分八類曰總例曰吉禮曰嘉禮曰軍禮曰凶禮曰廢禮曰新禮曰廟議凡一百卷始自建隆迄於嘉祐以開寶

通禮爲主參以禮閣新編太常新禮禮院儀注禮院例冊
慶厯祀儀及實錄會要封禪記鹵簿記等書四朝典禮粲
然具備是固政和五禮新儀以前所不可無之書也文淵
閣書曰焦氏經籍志俱著錄伏讀

欽定四庫全書總目云北宋一代典章如開寶禮太常因革禮
禮閣新儀今俱不傳云云則是書之佚久矣此本傳自蕭
山陸氏蓋從舊抄本傳錄者缺卷五十一至卷六十七凡
十七卷

臣修等聞昔秦燔滅詩書而禮樂尤其所惡故漢興二百
餘年而郊祀之禮聽於方士乘輿所御不過衾服及至顯
宗然後發憤太息鑿空耕荒以有三雍七郊百官備物輅
車衮冕以祀天地養三老五更於學然後後世有述焉漢

末喪亂永平遺文復就湮滅而江左學者猶能言之蕭梁
之時日不暇給猶命陸連賀瑒等五人分治五禮及至隋
文天下初合享國日淺亦能於兵燼之餘收集南北儀注
爲百三十篇故唐興得以沿襲爲正觀顯慶開元之禮古
之君子於戰伐崎嶇之中猶不忍禮樂之廢苟有一日之
安則相與戮力講求其勤如此宋有天下承平百年憲章
文物遠追三代而觀書於太常者獨有開寶通禮得爲完
書其餘顛倒脫落無所考證至不及漢唐者此有司失職
學者不講之過也昔太祖皇帝始命大臣約唐之舊爲開
寶通禮事爲之制以待將來其後更厯三朝隨事損益與
通禮異者十常三四苟新書不立而恃通禮以爲備則後
世將有惑焉故天聖中禮官王卬等論次已行之事名曰

禮閣新編其後賈昌朝等復加編定名曰太常新禮而禮閣新編止於天禧之五年太常新禮止於慶厯之三年又多遺畧不能兼收博采以示後世而二書之外存於簡牘者尙不可勝數付之胥史日以殘脫故嘉祐中臣修以爲言而先帝以屬修與凡禮官命臣闢臣洵專領其局始自建隆以來訖於嘉祐巨細必載罔羅殆盡以爲開寶通禮者一代之成法故以通禮爲主而記其變其不變者則有通禮存焉凡變者皆有所沿於通禮也其無所沿者謂之新禮通禮之所有而建隆以來不復舉者謂之廢禮凡始立廟皆有議論不可以不特見謂之廟議其餘皆卽用通禮條目爲一百篇以聞賜名曰太常因革禮雖不足以稱先帝考禮修業傳示無極之意猶庶幾於守職不廢以待

能者尙書吏部侍郎參知政事提舉編纂臣歐陽修龍圖閣直學士尙書兵部侍郎兼侍讀同判太常寺兼禮儀事臣李東之龍圖閣直學士左諫議大夫兼侍講崇文院檢討官同判太常寺兼禮儀事臣呂公著尙書工部郎中知制誥兼同判太常寺兼禮儀事臣宋敏求尙書屯田員外郎充集賢殿修撰同判太常寺兼禮儀事臣周孟陽尙書度支員外郎直祕閣兼充史館檢討同知禮院兼丞事臣呂夏卿尙書祠部員外郎充祕閣校理同知禮院臣李育祕書丞充集賢校理同知禮院臣陳繹太常博士禮院編纂臣姚闢守霸州文安縣主簿禮院編纂臣蘇洵等謹上太常因革禮老蘇先生奉詔所修也先是歐陽文忠公同判太常寺始建編修禮書之議朝廷雖從其請然猶重置

局就以命禮官既不專任閱歲久之書不果成嘉祐六年七月己酉乃以先生爲霸州文安縣主簿使食其祿與陳州項城縣令姚闢同編纂判寺官督趣歐陽公以參知政事提舉閱五年當治平二年九月辛酉而奏書成國史謂建隆以來三輯禮書嘉祐尤悉則謂此書也古者經禮三百曲禮三千自後世以禮著書者僅存其大槩或闕其彌文經禮粗詳而曲禮盡廢以故往往不可復考嘉祐書獨于損益去取異同之際莫不咸在當此時知制誥張環奏以國朝禮不合古制欲命大臣與禮官釐正紬繹然後垂之永久先生爭之以爲今亦編集故事使後世無忘之耳非曰制爲典禮遂使尊而行之也遇事而載之不擇善惡是記事之體也然則其凡例條目先生之定論蓋若此而昧者顧謂繁簡失中以植釀目之抑未之思歟其書以開寶通禮爲本而以儀注例冊附見之且參以實錄封禪記鹵簿記大樂記及他書經禮曲禮於是兩備張文定公所謂其事業不得舉而措之於天下獨新禮百篇今爲太常施用者是也錢侯太虛爲吾州盡刻蘇氏之書於學官所以加惠諸生甚厚且屬壁識其歲月因備列之于末云淳熙十五年正月郡人李壁書

郡齋讀書志曰太常因革禮一百卷皇朝姚闢蘇洵撰嘉祐中歐陽修言禮院文書放軼請禮官編修六年用張洞奏以命闢洵至治平二年乃成詔賜以名李清臣云開寶以後三輯禮書推其要歸嘉祐尤悉然繁簡失中訛闕不補豈有拘而不得騁乎何擅釀之甚也

政和御製冠禮十卷五禮新儀二百二十卷

舊抄本

宋鄭居中等撰

前有御筆指揮及尙書省議禮院累次

所上劄子御製冠禮十卷蓋當時頒此爲格式者故以弁首不入卷闕卷七十四卷八十八至九十卷一百八至一百十二卷一百二十八至一百三十七卷二百共闕二十卷

御製序曰禮緣人情而爲之節文先王稽其典常制其等差辨其儀物秩其名位所以正人倫定尊卑別貴賤也故有君道焉有父道焉有子道焉夫唱而婦隨兄友而弟恭莫不有敘人倫正也上不可以逼下下不得以僭上大不可以凌小小不可以加大無得而踰尊卑定也朝廷邦國鄉黨遂序有典有則有倫有節有條而不紊貴賤別也天

下有萬不同之情先王同之於一堂之上薄海內外雖愚夫愚婦莫敢以私智側言改度易制者以分定故也夫人倫正尊卑定貴賤別則分守明分守明則人志一人志一而好作亂者未之有也下不好亂上無僭差而天下不治者亦未之有也先王以是成教化移風俗其和至於廣樂其大至於與天地同節深所慕之朕獲承至尊洪惟祖考燕翼之謀垂休錫美功成治定厯考前世承平之久莫如今日然承五季禮廢樂壞大亂之後先王之澤竭士弊於俗學人溺於末習忘君臣之分廢父子之親失夫婦之道絕兄弟之好至以衆暴寡以智欺愚以勇威怯以彊陵弱庶人服侯服牆壁被文繡公卿與皂隸同制倡優下賤得爲后飾昏冠喪祭宮室器用家殊俗異人自爲制無復綱

紀幾年於茲未之能革昔在神考憲道立政稽若往古作
新斯人以追三代之隆謂安上治民別嫌明微釋回增美
莫善於禮親降策問下詢承學造庭之士將因今之材而
起之也命官討論郊祀之儀服章之飾是正訛舛大勳未
集仰惟先志明發不寐繼而承之罔敢忽怠乃詔有司張
官設屬講求比次以書來上朕乙夜省閱考驗先王制禮
之文親加筆削復命有司循古之意而勿泥於古適今之
宜而勿率於今乃作吉禮以祀以祭以享乃作凶禮以哀
以弔以禴以恤乃作賓禮以朝以會以覲以問乃作軍禮
以用衆恤衆簡衆任衆合衆乃作嘉禮以親宗族親男女
親賓客親異國籩豆尊罍冕弁旂常車輿圭璧羔鴈幣筐
有不可施於今則用之有時示不廢古有不可用於時則

惟法其義示不違今又爲之多寡之數高下之等長短之
度䟽數之限將自躬而達之天下自朝廷而達於庶民使
士安於分無見利忘義之心人知所守無犯令陵政之悖
四方以無拂而天下如一家爭訟之端庶幾永息廉恥之
道庶幾乎興而刑其措歟傳曰商因於夏禮所損益可知
也周因於商禮所損益可知也其或繼周百世可知也今
天下去周千有餘歲道之不明未有䟽於此時也世染汚
俗冒上無等未有甚於此時也朕因今之俗倣古之政以
道損益制而用之推而行之由乎百世之後奮乎百世之
上等百世之王若合符契其歸一揆所謂百世而繼周者
也雖其法其制本頒天下朕將禮刑並用俟之以慶賞刑
威遙觀厥成焉萬機之暇書其意記其制作之因以兼明

天下後世政和新元三月一日序

尙書省牒議禮院知樞密院事鄭居中等劄子奏竊以禮有五經而威儀至於三千事爲節文物有防範本數末度形名比詳遭秦變古書缺簡脫遠則開元所紀多襲隋餘近則開寶之傳間存唐舊在昔神考躋時極治新美憲章是正郊廟緝熙先猷實在今日恭惟陛下德備明聖觀時會通攷古驗今沿情稱事斷自聖學付之有司因革綱要旣爲禮書纖悉科條又載儀注勒成一代之典跨越三王之隆臣等備員參訂後更歲月悉稟訓持靡所建明謹編成政和五禮新儀并序例總二百二十卷目錄六卷共一百二十六冊辨疑正誤推本六經朝著官稱一遵近制上之御府仰塵乙覽恭候宸筆裁定其當以治神人以辨上下從事新書其自今始若夫蒐補闕遺講明稀闕告成功而示德意則臣等顧雖匪材猶當時順聖志而成之取進止牒奉勅宜頒降牒至准敕故牒

政和三年四月二十九日牒

大金集禮四十卷

舊抄本

述古堂藏書

金張暉

闕卷十二至十八又卷三十三是書紙質甚

鬆蓋以閣中預備票擬之紙寫錄敏求記直以爲金人鈔本似未的

何氏手跋曰此書乃錢遵王故物康熙己丑余偶至虞山得之質庫所鬻禱書中不知何時何人從文淵閣抄出者前代票擬皆裁此紙作簽今則彌踈而易壞爛然其種類

一也何焯記

大金德運圖說一卷

文瀾閣傳抄本

金貞祐二年尚書省集議德運之案牘也

廟學典禮六卷

文瀾閣傳抄本

不著撰人名氏

右儀制

補漢兵志一卷

舊抄本 玉蘭堂藏書

宋白石先生錢氏文子撰 玉蘭堂毛子晉季滄葦席玉

照楊繼梁俱有印記題籤尙是子晉手筆可貴也

陳元粹序 嘉定甲戌

王大昌跋 嘉定乙亥

右軍政

故唐律疏議三十卷附釋文纂例 元至順刊本

唐太尉揚州都督監修國史上柱國趙國公長孫無忌等

撰釋文此山賈洽子撰 時代未詳 元奉訓大夫江西等處行中

書省檢校官王元亮重編纂例奉訓大夫江西等處行中

書省檢校官王元亮撰 柳賚序後有至順壬申五月印

一行釋文序後有至正辛卯孟春重校一行又有崇化余

志安刊於勤有堂木記末卷有考亭書院學生余資編校

一行

柳賚序 泰定四年

劉有慶纂例序 泰定二年

無名氏釋文序

進表 永徽四年

律文十二卷音義一卷 抄本 從陳君子準藏影宋本傳錄

音義宋翰林侍讀學士中大夫尚書兵部侍郎兼羣牧使判國子監太常禮院上柱國樂安郡開國公食邑二千二百戶食實封四百戶賜紫金魚袋臣孫奭等撰 曰名例曰衛禁曰職制曰戶婚曰廩庫曰擅興曰賊盜曰鬪訟曰詐譌曰雜律曰捕亡曰斷獄凡十二律爲十二卷後有天聖七年四月日准勅送崇文院雕造一行直齋書錄解題曰律文十二卷音義一卷自魏李悝漢蕭何以來更三國六朝隋唐因革損益備矣本朝天聖中孫奭等撰音義自名例至斷獄歷代異名皆著之

慶元條法事類八十卷附開禧重修尚書吏部侍郎右選格二卷抄本

不著換人名氏

案宋史宣宗本紀嘉泰二年謝深甫等

上慶元條法事類直齋書錄解題有嘉泰條法事類八十九卷云宰相謝深甫等嘉泰二年表上蓋舉其奉詔之時則曰慶元據其成書之日則曰嘉泰一書而異名耳闕卷一卷二卷十八至二十七卷三十三至三十五卷三十八至四十六卷五十三至七十二共闕四十四卷未附開禧重修尚書吏部侍郎右選格二卷蓋卽宋史所載開禧重修七司法文淵閣書目著錄二十冊此其殘闕之本也直齋書錄解題曰嘉泰條法事類八十卷天台謝深甫子肅等嘉泰二年表上初吏部七司有條法總類淳熙新書旣成孝宗詔做七司體分門修纂別爲一書以事類爲名至是以慶元新書修定頒降此書便於檢閱引用惜乎不併及刑統也

大元聖政國朝典章六十卷

舊抄本

曝書亭藏書

不著撰人名氏

大德七年中書省劄節文准江西奉使宣撫呈乞照中統以至今日所定格例編集成書頒行天下照得先據御史臺比及國家定立律令以來合從中書省爲頭一切隨朝衙門各各編類中統建元至今聖旨條畫及朝廷已行格例置簿編寫檢舉仍令監察御史及各道刑按察司體究成否庶官吏有所持循政令不至廢弛已經遍行合屬依上施行去訖今據見呈仰照驗施行

大元聖政典章新集至治條例

舊抄本

至治二年新集

大元聖政典章自中統建元至延祐四年所降條畫板行

四方已有年矣欽惟皇朝政令誕新朝綱大振省臺院部恪遵成典今謹自至治新元以迄今日頒降條畫及前所未刊新例類聚梓行使官有成規民無犯法其於政治豈小補云

至治二年以後新例候有頒降隨類編入梓行不以刻板已成而斬於附益也至治二年六月日謹咨

右法令

營造法式三十四卷

影寫宋刊本

宋通直郎管修葢皇弟外第專一提舉修葢班直諸軍營房等臣李誠奉聖旨編修

編修營造法式所準崇寧二年正月十九日敕通直郎試將作少監提舉修置外學等李誠劄子奏契勘熙寧中敕

令將作監編修營造法式至元祐六年方成書準紹聖四年十一月二日敕以元祐營造法式祇是料狀別無變造用材制度其間工料太寬關防無術三省同奉聖旨著臣重別編修臣考究經史羣書并勒匠人逐一講說編修海行營造法式元符三年內成書送所屬看詳別無未盡未便遂具進呈奉聖旨依續準都省指揮只錄送在京官司竊緣上所法式係營造制度工限等關防功料最爲要切內外皆合通行臣今欲乞用小字鏤版依海行敕令頒降取進止正月十八日三省同奉聖旨依奏

臣聞上棟下宇易爲大壯之時正位辨方禮實太平之典共工命於舜日大匠始於漢朝各有司存按爲功緒况神畿之千里加禁闕之九重內財宮寢之宜外定廟朝之次

蟬聯庶府碁列百司櫺檻栱柱之相枝規矩準繩之先治五材並用百堵皆興惟時鳩僝之工遂考翬飛之室而斲輪之手巧或失真董役之官才非兼技不知以材而定分乃或倍斗而取長弊積因循法踈檢察非有治三宮之精識豈能新一代之成規溫詔下頒成書入奏空靡歲月無補涓塵恭惟皇帝陛下仁儉生知睿明天縱淵靜而百姓定綱舉而衆目張官得其人事爲之制丹楹刻桷淫巧旣除菲食卑宮淳風斯復乃詔百工之事更資千慮之愚臣攷閱舊章稽參衆智功分三等第爲精粗之著役辨四時用度長短之晷以至木議剛柔而理無不順上評遠邇而力易以供類例相從條章俱在研精覃思顧述者之非工按牒披圖或將來之有補通直郎管修葺皇弟外第專一

提舉修葺班直諸軍營房等編修臣李誠謹昧死上
平江府今得紹聖營造法式舊本并目錄看詳共一十四
册紹興十五年五月十一日校勘重刊
右考功

愛日精廬藏書志卷十九終

愛日精廬藏書志卷二十

史部

目錄類

秘書省續編到四庫闕書二卷 曹抄本

紹興 年改定 玉海云紹興初改定崇文總目秘書省續
編四庫闕書又云紹興十七年鄭樵按秘書省所頒闕書目
錄集爲求書闕記七卷此本卽改定頒行之闕書目錄也
通志藝文畧引四庫書目書名卷數俱與此合校讎畧曰
四庫書目以星禽洞微之書列於天文又曰軌革一家四
庫收入五行類又曰諡法四庫書目入禮類又曰四庫書
目旣立命書類 今本作命術 而三命五命之書復入五行卜筮
類又曰遁甲一種書耳四庫書目分而爲四類兵書見之

五行卜筮又見之壬課又見之命書又見之又日月令乃禮家之一類四庫書目見於禮類又見於兵家又見於農家又見於月鑑今本無月鑑一類或亦稍有關係耶又曰太元經以諱故崇文改爲太真四庫書目分太元太真爲兩家書又曰唐志以封演錢譜列於小說家崇文四庫因之凡此之類證之此本一一符合郡齋讀書志曰藝文志以爾雅附孝經類經籍志又以附論語類皆非是今依四庫書目置於小學之首亦與此本合若是則是書初名四庫書目紹興時添注闕字頒之天下者也至四庫書目編於何時何人姑俟續考

直齋書錄解題曰秘書省四庫闕書目一卷亦紹興改定其闕者注闕字於逐書之下

直齋書錄解題殘本四卷

舊抄本

宋陳振孫撰

存楚詞類一卷別集類三卷 四庫全書

著錄本係從永樂大典錄出者此則原本殘帙也

右經籍

金石錄三十卷

舊抄本

菴竹堂藏書

宋趙明誠撰

此葉文莊公舊藏本也首尾二頁及板心

卷數則公所自書

見國華及何義門跋

自序

劉跂序

政和七年

明誠室易安後序

趙不讒跋

開禧改元

葉氏手跋曰金石錄余求之三十年不可得壬辰冬始遇

此善本於京師如獲寶玉然鈔畢畧觀一度其於集古錄正誤最多誠亦精審已雖然自昔著書家几塵風葉之喻前后彼此蓋恒有之不足怪也吾安得歐陽棗策古錄目洪丞相漢錄釋等書悉集於此而又有閒暇工夫稍盡心焉亦平生之一適也漫筆之以俟成化九年二月朔旦吳郡葉仲盛甫志

葉國華手跋曰金石錄近無刻本是本爲先文莊公鈔藏復經先大父手輯一過不知何時散逸頃從吳興書賈高價售之還我舊物先公云遇此善本如獲寶玉今小子得之則不啻傳家之天球河圖矣後之人其□□□□崇禎癸未仲秋晦日六世元孫國華百拜識

上及卷心次第數目皆先公手蹟

何氏手跋曰金石錄三十卷崑山葉文莊公故物首尾二紙則公手所自書余收得吳文定公寫本書亦皆然乃知前賢事事必有體源貴乎多見而識之也康熙己丑五月

何焯記

乙上在京師心友書來則又收得吳文定叢書堂本矣并下闕

金石錄三十卷

舊抄本

汲古閣藏書

宋趙明誠撰

是本行欵格式俱仿葉文莊公原本惟原

本二十四卷以下有破損霉爛處予所見義門藏本如葦

陽國志張來儀文集等書往往如是蓋何氏覆舟西江所

致也何氏羅昭諫集跋云庚辰嘉平月焯自潮郡榕城旋

時際仲冬雨雪連綿曝無日色舟師急於請行凡濕書籍咸以爐火烘焙奈奚童又不經心失于翻檢微染焦薰之

痕云 此本尚係未經水厄時所鈔可補原本之闕故並存之

趙明誠序

劉跂序

明誠室易安後序

趙不譟跋

葉仲盛跋 俱見上

何氏手跋曰鈔此書者格行皆仿澱東老漁元本槧成可

謂好事矣康熙壬辰汲古主人命余校後跋中譌字因識

後生何焯

隸續七卷 元泰定刊本

宋洪适撰

三四卷未有泰定乙丑宣國路儒學重刊一

條

隸續十四卷 校影鈔宋本

宋洪适撰

顧君澗蕢據毛氏影寫宋刊本校卷十三鄧

君闕畫象下校補跋尾一段計八十八字又補無名人墓

闕畫象一行王稚子闕沛相范皮闕後俱補繪畫象

顧廣圻為蕢圃校自第八卷至末皆據汲古閣毛氏影鈔

宋本時嘉慶丁巳八月 共一百十九葉又跋三頁又元空

寶刻叢編二十卷 文瀾閣傳抄本

宋陳思撰 闕四卷九卷十一十二十六十七凡六卷

寶刻類編八卷 文瀾閣傳抄本

宋洪适撰

絳帖釋文二卷 抄本 從陳君子準藏舊抄本傳錄

宋會樂撰

案自序曰絳帖筆勢放逸石本磨滅學者每患其難通槃嘗欲作釋文未果會有以北人所著見畀者因附益以舊所考證刻之桐川郡齋云云蓋金人舊本而槃附益之者也

諸家書帖閣下舊本今時已不多見惟絳帖尚復流傳但筆勢放逸石本磨滅學者每患其難通槃嘗欲取古今訓釋參其同異爲作釋文因循未果會有以北人所著見畀者因附益以舊所考證刻之桐川郡齋大抵古帖多非全文歲月既深傳摹不一其語意之斷續字畫之誤舛欲書通貫難矣今亦姑取其可解者訓釋之固不敢自以爲是好事者開卷之際儻有所見能爲鍼砭以成此書是所望也嘉泰癸亥六月下澣穎川會樂樂道謹識

右金石

史評類

類編皇朝大事記講義二十三卷

抄本

宋黃甲省元肇慶府學教授溫陵呂中講義省元國學前進士三山繆烈皋蘭蔡柄編校

予頃遊膠庠有同舍示一編書曰此止齋水心之徒以其師講貫之素發明我朝聖君賢相之心所以措之事業垂億萬年無疆之休者其槩可見也是書年以記大事一朝之事類之隨朝分類隨事通釋考求源委顯微闡幽言近而指遠也大抵論朝廷必歸之君心論官僚必歸之宰輔論良法必歸於美意敵國外患必歸於自治其國食其實者審其根酌其流者滌其源也至於論治體之寬嚴謂建

隆尙嚴也自李文靖焚四方利害之言所以積而爲慶歷
嘉祐之緩勢仁祖尙寬也自范文正公天章閣一疏不行
所以 而爲熙豐之急政且謂王荆公之 卽范文公
之遺意文正公主於立國荆公主於利國使文正之說遍
行則荆公之口可塞惟正公之言不通行於慶歷故荆公
之學乃遍行於熙豐神宗銳然有爲之志不遇范仲淹而
遇王安石此世道升降之會也至於祈天永命保民長世
之基則以祖宗之仁意常在於紀綱整肅之中而紀綱不
出於仁意流行之外故治體似寬柔而實疑制度似煩密
而實 國勢似緩弱而實久雖中更新法之毒亂強敵之
憑陵權奸之剝喪貪酷之奮攘敢於怨吏而不忍讐吾君
敢於顛天而不忍叛吾國於是天心之仁愛亦惓惓而不

忍釋實甫斂衣端誦纔竟藝祖皇帝一編已屢掩卷而三
嘆也嗟夫厭亂之民思治玩治之民思亂排患難之膠轕
者以安爲危不期於質朴而自不能不淳也習太平之見
聞者以安爲危不期於奢麗而自不能不薄也思治而一
於質朴者聖人出而萬物覩矣思亂而競於奢麗者雖聖
人亦必百倍其功而後可挽也然則藝祖皇帝之闢闢造
化所以使人人一心事事一實者何其盛哉夫當世道之
極變而道之惟卓然思所以更新者靡一事一物之可因
仍也故世非承平不得以承平之事爲比夸言慶歷元祐
於非慶歷元祐之世者非愚則諛抑又嘗拜觀藝祖皇帝
問趙普曰天下何物最大普對曰道理最大此堯舜之問
稷契之對也我朝所以理學 者其論已兆於此而國

家延洪之休所以超軼漢唐者徒恃有此義理耳含義理而言治非知言者也此書之作其有本乎書肆請以刻梓且求序之因書於首編如此抑嵇叔夜有云野人快炙背而美芹子者欲獻之至尊雖有區區之意亦已疎矣愚則不敢惟願與學者審其是而已淳祐丁未上元前一日迪功郎前興國軍軍學教授劉實甫序

呂府教舊遊庠序慣熟國史因作監本資治通鑑摘其切於大綱者目分爲門類集爲講義場屋中用之如庖丁解牛不勞餘及昨已刊行取信於天下學者有年矣今來舊板漫滅有妨披覽是用重加整頓正其差舛補其踈畧命工繡梓整然一新視原本大有徑庭所謂愈出而愈奇者收書君子幸垂藻鑑

皇朝大事記九卷中興大事記四卷

舊抄本

千頃堂藏書

宋黃甲省元肇慶府學教授溫陵呂中講義省元國學前進士三山繆烈蘭臯蔡柄編校 皇朝大事記始太祖迄

欽宗後附治體制度國勢論三篇中興大事記始高宗迄宣宗後附中興規模中興制度中興國勢論三篇每一朝爲一卷皇朝大事記較二十三卷本頗多刪節中興大事記世無傳本以宋史全文所引考之蓋亦刪節之本也

黃氏手跋曰中字時可晉江人淳祐七年廷對第六人教授肇慶府除國史實錄院檢閱上疏言當去小人之根革職吏之弊遷國子監丞兼崇政殿說書言人能正心則事不足爲人君能正心則事不足治理宗嘉納之以予給歸召爲祕書郎丁大全忌之出知汀州尋復舊官主管成都

玉局觀卒是書予得之戊子春迄今丁巳已三十年矣鄉後學黃虞稷題

舊聞證誤殘本二卷 宋刊本 汲古閣藏書

宋秀巖李心傳伯微甫撰 原十五卷 四庫全書從永

樂大典錄出編為四卷此則原本一二兩卷也

史纂通要後集三卷 影寫元刊本

元番陽董鼎季亨纂 是書括宋金兩朝事迹繫以論斷

以續胡一桂之書故曰後集

愛日精廬藏書志卷二十終



